


韓文  
四





PL  
2670  
A1  
1854  
v.4









韓文卷之二十

序

送董邵南序

燕趙古稱多感慨悲歌之士。董生舉進士，連不得志於有司，懷抱利器，鬱鬱適茲土。吾知其必有合也。董生勉乎哉！夫以子之不遇時，苟慕義彊仁者，皆愛惜焉。矧燕趙之士出乎其性者哉！然吾嘗聞風俗與化移易，吾惡知其今不異於古所云邪？聊以吾子之行卜之也。董生勉乎哉！吾因子有所感矣。爲我弔望諸君之墓，而觀於其市，復有昔時屠狗者乎？爲我謝曰：「明天子在。」可以出而仕矣。

贈崔復州序



有地數百里趨走之吏自長史司馬已下數十人其祿足以仁其三族及其朋友故舊樂乎心則一境之人喜不樂乎心則一境之人懼丈夫官至刺史亦榮矣雖然幽遠之小民其足跡未嘗至城邑苟有不得其所能自直於鄉里之吏者鮮矣況能自辨於縣吏乎能自辨於縣吏者鮮矣況能自辨於刺史之庭乎由是刺史有所不聞小民有所不宣賦有常而民產無恒水旱癘疫之不期民之豐約懸於州句縣令不以言連帥不以信民就窮而歛愈急吾見刺史之難爲也崔君爲復州其連帥則于公崔君之仁足以蘇復人于公之賢足以庸崔君有刺史之榮而無其難爲者將在於此乎愈嘗辱于公之知而舊游于崔君慶復



人之將蒙其休澤也。於是乎言。

贈張童子序

天下之以明二經舉於禮部者。歲至三千人。始自縣考試。定其可舉者。然後升於州。若府。其不能中科者。不與是數焉。州若府。總其屬之所升。又考試之。如縣。加察詳焉。定其可舉者。然後貢於天子。而升之。有司其不能中科者。不與是數焉。謂之鄉貢。有司者。總府州之所升。而考試之。加察詳焉。第其可進者。以名上於天子。而藏之。屬之吏部。歲不及二百人。謂之出身。能在是選者。厥惟艱哉。二經章句。僅數十萬言。其傳注在外。皆誦之。又約知其大說。繇是舉者。或遠至十餘年。然後與乎三千之數。而升於禮部矣。又或



遠至十餘年。然後與乎二百之數。而進於吏部矣。班白之老半焉。昏塞不能及者。皆不在是限。有終身不得與者焉。張童子生九年。自州縣達禮部。一舉而進立於二百之列。又二年益通二經。有司復上其事。繇是拜衛兵曹之命。人皆謂童子耳目明達。神氣以靈。余亦偉童子之獨出于等夷也。童子請於其官之長。隨父而寧母。歲八月。自京師道陝南至虢。東及洛師。北過大河之陽。九月始來及鄭。自朝之聞人。以及五都之伯長羣吏。皆厚其餼賂。或作謠詩。以嘉童子。童子亦榮矣。雖然。愈將進童子於道。使人謂童子求益者。非欲速成者。夫少之與長也。異觀。少之時。人惟童子之異。及其長也。將責成人之禮焉。成人之禮。非盡於童



子所能而已也。然則童子宜暫息乎其已學者而勤乎其未學者可也。愈與童子俱陸公之門人也。慕回路二子之相請贈與處也。故有以贈童子。

### 送浮屠文暢師序

人固有儒名而墨行者。問其名則是。校其行則非。可以與之游乎。如有墨名而儒行者。問其名則非。校其行則是。可以與之游乎。楊子雲稱在門牆則揮之。在夷狄則進之。吾取以爲法焉。浮屠師文暢喜文章。其周遊天下。凡有行。必請於搢紳先生。以求咏歌其所志。貞元十九年春。將行東南。柳君宗元爲之請解其裝。得所得叙詩累百餘篇。非至篤好。其何能致多如是邪。惜其無以聖人之道告之者。而徒



舉浮屠之說贈焉。夫文暢浮屠也。如欲聞浮屠之說。當自就其師而問之。何故謁吾徒而來請也。彼見吾君臣父子之懿。文物事爲之盛。其心有慕焉。拘其法而未能入。故樂聞其說而請之。如吾徒者。宜當告之以二帝三王之道。日月星辰之行。天地之所以著。鬼神之所以幽。人物之所以蕃。江河之所以流。而語之。不當又爲浮屠之說而瀆告之也。民之初生。固若禽獸。夷狄然。聖人者立。然后知宮居而粒食。親親而尊尊。生者養而死者藏。是故道莫大乎仁義。教莫正乎禮樂。刑政施之於天下。萬物得其宜。措之於其躬。體安而氣平。堯以是傳之舜。舜以是傳之禹。禹以是傳之湯。湯以是傳之文武。文武以是傳之周公孔子。書之於



冊中國之人世守之。今浮屠者孰爲而孰傳之邪。夫鳥俛而啄。仰而四顧。夫獸深居而簡出。懼物之爲已害也。猶且不脫焉。弱之肉。彊之食。今吾與文暢安居而暇食。優游以生死。與禽獸異者。寧可不知其所自邪。夫不知者非其人之罪也。知而不爲者。惑也。悅乎故。不能即乎新者。弱也。知而不以告之者。不仁也。告而不以實者。不信也。余旣重柳請。又嘉浮屠能喜文辭。於是乎言。

### 送楊支使序

愈在京師時。嘗聞當今藩翰之賓客。惟宣州爲多賢。與之游者二人。隴西李博。清河崔羣。羣與博之爲人。吾知之道不行於主人。與之處者。非其類。雖有享之以季氏之富。不



韓文公集卷之二十一  
四  
一日留也。以羣博論之。凡在宣州之幕下者。雖不盡與之遊。皆可信而得其爲人矣。愈未嘗至宣州。而樂頌其主人之賢者。以其取人信之也。今中丞之在朝。愈日待言於門下。其來而鎮茲土也。有問湖南之賓客者。愈曰。知其客可以信其主者。宣州也。知其主可以信其客者。湖南也。去年冬。奉詔爲邑於陽山。然後得謁湖南之賓客於幕下。於是知前之信之也不失矣。及儀之之來也。聞其言而見其行。則向之所謂羣與博者。吾何先後焉。儀之智足以造謀材。足以立事。忠足以勤上。惠足以存下。而又侈之以詩書六藝之學。先聖賢之德音。以成其文。以附其質。宜乎從事於是府。而流聲實於天朝也。夫樂道人之善。以勤其歸者。乃



吾之心也。謂我爲邑長於斯而媚夫人云者，不知言者也。工乎詩者，歌以繫之。

### 送何堅序

何於韓同姓爲近，堅以進士舉於吾爲同業，其在太學也，吾爲博士，堅爲生，生博士爲同道，其識堅也十年，爲故人同姓而近也，同業也，同道也，故人也。於其不得願而歸，其可以無言邪？堅道州人，道之守陽公賢也，道於湖南爲屬州，湖南楊公又賢也，堅爲民，堅又賢也，湖南得道爲屬，道得堅爲民，堅歸唱其州之父老子弟，服陽公之令，道亦唱其縣與其比州，服楊公之令，吾聞鳥有鳳者，恒出於有道之國，當漢時，黃霸爲潁川，是鳥實集而鳴焉，若史可信，堅



歸。吾將賀其見鳳而聞其鳴也已。

送廖道士序

五岳於中州。衡山最遠。南方之山。巍然高而大者。以百數。獨衡爲宗。最遠而獨爲宗。其神必靈。衡之南八九百里。地益高。山益峻。水清而益駛。其最高而橫絕南北者。嶺。郴之爲州。在嶺之上。測其高下。得三之二焉。中州清淑之氣。於是焉窮。氣之所窮。盛而不過。必蛻。音宛。蟪。音善。扶輿磅礴。音薄。而鬱積。衡山之神。旣靈。而郴之爲州。又當中州清淑之氣。蛇蟪扶輿磅礴。而鬱積。其水土之所生。神氣之所感。白金水銀丹砂。石英鍾乳。橘柚之包。竹箭之美。千尋之名林。不能獨當也。意必有魁奇忠信材德之民生其間。吾又未見。



也其無乃迷惑溺沒於佛老之學而不出邪。廖師郴民而學於衡山。氣專而容寂。多藝而善遊。豈吾所謂魁奇而迷溺者邪。廖師善知人。若不在其身。必在其所與遊。訪之而不吾告。何也。於其別。申以問之。

### 送王秀才序

吾少時讀醉鄉記。私怪隱居者無所累於世。而猶有是言。豈誠甘於味邪。及讀阮籍陶潛詩。乃知彼雖偃蹇不欲與世接。然猶未能平其心。或爲事物是非相感發。於是有託而逃焉者也。若顏氏子。操瓢與簞。曾參歌聲若出金石。彼得聖人而師之。汲汲每若不可及。其於外也固不暇。尚何翹蘖之託。而昏冥之逃邪。吾又以爲悲醉鄉之徒不遇也。



建中初天子嗣位有意貞觀開元之不績在廷之臣爭言事當此時醉鄉之後世又以直廢吾既悲醉鄉之文辭而又嘉良臣之烈思識其子孫今子之來見我也無所挾吾猶將張之况文與行不失其世守渾然端且厚惜乎吾力不能振之而其言不見信於世也於其行姑與之飲酒

### 送孟秀才序

今年秋見孟氏子瑄於郴年甚少禮甚度手其文一編甚鉅退披其編以讀之盡其書無有不能吾固心存而目識音之矣其十月吾道於衡潭以之荆累累見孟氏子焉其所與偕盡善人長者吾益以奇之今將去是而隨舉於京師雖不有請猶將疆而授之以就其志况其請之煩邪京



師之進士以千數。其人靡所不有。吾常折肱焉。其要在詳擇而固交之。善雖不吾與。吾將彊而附。不善雖不吾惡。吾將彊而拒。苟如是。其於高爵。猶階而升堂。又况其細者邪。

送陳秀才彤序

讀書以爲學。續言以爲文。非以誇多而鬪靡也。蓋學所以爲道。文所以爲理耳。苟行事得其宜。出言適其要。雖不吾面。吾將信其富於文學也。潁川陳彤。始吾見之。楊湖南門下。頎然其長。薰然其和。吾目其貌。耳其言。因以得其爲人。及其久也。果若不可及。夫湖南之於人。不輕以事接。爭名者之於藝。不可以虛屈。吾見湖南之禮有加。而同進之士交譽也。又以信吾信之不失也。如是而又問焉。以質其學。



策焉以考其文則何信之有故吾不徵於陳而陳亦不出於我此豈非古人所謂可爲智者道難與俗人言者類邪凡吾從事於斯也久未見舉進士有如陳生而不如志者於其行姑以是贈之

送王秀才序

吾常以爲孔子之道大而能博門弟子不能徧觀而盡識也故學焉而皆得其性之所近其後離散分處諸侯之國又各以所能授弟子原遠而末益分蓋子夏之學其後有田子方子方之後流而爲莊周故周之書喜稱子方之爲人荀卿之書語聖人必曰孔子子弓子弓之事業不傳惟太史公書弟子傳有姓名字曰馯音寒臂子弓子弓受易於



商瞿。孟軻師子思。子思之學。蓋出曾子。自孔子沒。羣弟子莫不有書。獨孟軻氏之傳得其宗。故吾少而樂觀焉。太原王埴示予所爲文。好舉孟子之所道者。與之言。信悅孟子。而屢贊其文辭。夫沿河而下。苟不止。雖有遲疾。必至於海。如不得其道也。雖疾不止。終莫幸而至焉。故學者必慎其所道。道於楊墨老莊佛之學。而欲之聖人之道。猶航斷港絕潢。以望至於海也。故求觀聖人之道。必自孟子始。今埴之所由。旣幾於知道。如又得其船與楫。知沿而不止。嗚呼。其可量也哉。

### 荆潭唱和詩序

從事有示愈以荆潭酬和詩者。愈旣受以卒業。因仰而言



曰夫和平之音淡薄而愁思之聲要妙謹愉之辭難工而窮苦之言易好也是故文章之作恒發於羈旅草野至若王公貴人氣滿志得非性能而好之則不暇以爲今僕射裴公開鎮蠻荆統郡惟九常侍楊公領湖之南壤地二千里德刑之政並勤爵祿之報兩崇乃能存志乎詩書寓辭乎詠歌往復循環有唱斯和搜奇挾恠雕鏤文字與常布里閭憔悴專一之士較其毫釐分寸鏗鏘發金石幽眇感鬼神信所謂材全而能鉅者也兩府之從事與部屬之吏屬而和之苟在編者咸可觀也宜乎施諸樂章紀諸冊書從事曰子之言是也告於公書以爲荆潭唱和詩序

送幽州李端公序



元年。今相國李公爲吏部員外郎。愈嘗與偕朝。道語幽州  
司徒公之賢曰。某前年被詔告禮幽州。入其地。迂勞之。使  
里至。每進益恭。及郊。司徒公紅帔首。韡許戈切袴握刀。左右  
雜佩弓韡丑亮切服。矢插房。俯立迎道左。某禮辭曰。公天子  
之宰。禮不可如是。及府。又以其服即事。某又曰。公三公。不  
可以將服承命。卒不得辭。上堂即客階。坐必東向。愈曰。國  
家失太平。於今六十年。夫十日十二子相配。數窮六十。其  
將復平。句平必自幽州始。亂之所出也。今天子大聖。司徒  
公勤於禮。庶幾帥先河南北之將。來覲奉職。如開元時乎。  
李公曰。然。今李公旣朝夕左右。必數數焉爲上言。元年之  
言。殆合矣。端公歲時來壽其親。東都東都之大夫士莫不



拜于門其爲人佐甚忠意欲司徒公功名流千萬歲請以  
愈言爲使歸之獻

韓文卷之二十終



韓文卷之二十一

序

送區冊序

陽山天下之窮處也。陸有丘陵之險，虎豹之虞。江流悍急，橫波之石，廉利侔劔戟。舟上下失勢，破碎淪溺者，往往有之。縣郭無居民，官無丞尉。夾江荒茅篁竹之間，小吏十餘家，皆烏言夷面，始至言語不通，畫地爲字，然後可告以出租賦奉期約。是以賓客游從之士，無所爲而至，愈待罪於斯。且半歲矣，有區音歐生者，誓言相好，自南海挈舟而來，升自賓階，儀觀甚偉。坐與之語，文義卓然。莊周云：「逃空虛者，聞人足音，蹙音空然而喜矣。」況如斯人者，豈易得哉！入吾室，



聞詩書仁義之說欣然喜若有志於其間也與之翳嘉林  
坐石磯投竿而漁陶然以樂若能遺外聲利而不厭乎貧  
賤也歲之初吉歸拜其親酒壺旣傾序以識別

### 送張道士序

張道士嵩高之隱者通古今學有文武長材寄迹老子法  
中爲道士以養其親九年聞朝廷將治東方貢賦之不如  
法者三獻書不報長揖而去京師士大夫多爲詩以贈而  
屬愈爲序詩曰

大匠無棄材尋尺各有施况當營都邑杞梓用不疑張侯  
嵩山來面有熊豹姿開口論利害劒鋒白差差恨無一尺  
捶爲國咎羌夷詣闕三上書臣非黃冠師臣有膽與氣不



忍死茅茨又不媚笑語不能伴兒嬉乃著道士服衆人莫  
臣知臣有平賊策狂童不難治平聲其言簡且要陛下幸聽  
之天空日月高下照理不遺或是章奏繁裁擇未及斯寧  
當不俟報歸袖風披披荅我事不爾吾親屬吾思昨宵夢  
倚門手取連環持今日有書至又言歸何時霜天熟柿栗  
收拾不可遲嶺北梁可構寒魚下清伊旣非公家用且復  
還其私從容進退間無一不合宜時有利不利雖賢欲奚  
爲但當勵前操富貴非公誰

送高閑上人序

苟可以寓其巧智使機應於心不挫於氣則神完而守固  
雖外物至不膠於心堯舜禹湯治天下養叔治射庖丁治



牛師曠治音聲。扁鵲治病。僚之於九秋之於奕伯倫之於

酒樂之終身不厭。奚暇外慕。夫外慕徙業者。皆不造其堂。

不濟

音其裁

側吏切

者也。往時張旭善草書。不治他伎。喜怒

窘窮憂悲愉佚怨恨思慕酣醉無聊不平。有動於心。必於

草書焉發之。觀於物。見山水崖谷。鳥獸蟲魚。草木之花實。

日月列星。風雨水火。雷霆霹靂。歌舞戰鬪。天地事物之變。

可喜可愕。一寓於書。故旭之書。變動猶鬼神。不可端倪。以

此終其身而名後世。今閑之於草書。有旭之心哉。不得其

心而逐其跡。未見其能旭也。爲旭有道。利害必明。無遺鎔

銖。情炎於中。利欲鬪進。有得有喪。勃然不釋。然後一決於

書。而後旭可幾也。今閑師浮屠氏。一死生。解外膠。是其爲



心必泊然無所起。其於世必淡然無所嗜。泊與淡相遭。頽墮委靡。潰敗不可收拾。則其於書得無象之然乎。然吾聞浮屠人善幻多技能。閑如通其術。則吾不能知矣。

送殷員外序

唐受天命爲天子。凡四方萬國。不問海內外。無小大。咸臣順於朝。時節貢水土百物。大者特來。小者附集。元和睿聖文武皇帝旣嗣位。悉治方內。就法度。十二年詔曰。四方萬國。惟回鶻於唐最親。奉職尤謹。丞相其選宗室四品一人持節往。賜君長告之朕意。又選學有經術。通知時事者一人與之爲貳。由是殷侯侑自太常博士遷尚書虞部員外郎兼侍御史。朱衣象笏。承命以行。朝之大夫莫不出餞酒。



半右庶子韓愈執轡言曰殷大夫今人適數百里出門惘  
惘有離別可憐之色持被入直三省丁寧顧婢子語刺刺  
七迹切不能休今子使萬里外國獨無幾微出於言面豈不  
真知輕重大丈夫哉丞相以子應詔真誠知人士不通經  
果不足用於是以相屬爲詩以道其行云

### 送楊少尹序

昔疏廣受二子以年老一朝辭位而去于時公卿設供張  
祖道都門外車數百兩道路觀者多歎息泣下共言其賢  
漢史旣傳其事而後世工畫者又圖其迹至今照人耳目  
赫赫若前日事國子司業楊君巨源方以能詩訓後進一  
旦以年滿七十亦白丞相去歸其鄉世常說古今人不相



及今楊與二疏其意豈異也予忝在公卿後遇病不能出不知楊侯去時城門外送者幾人車幾兩馬幾疋道傍觀者亦有歎息知其爲賢以否而太史氏又能張大其事爲傳繼二疏蹤跡否不落莫否見今世無工畫者而畫與不畫固不論也然吾聞楊侯之去丞相有愛而惜之者白以爲其都少尹不絕其祿又爲歌詩以勸之京師之長於詩者亦屬而和之又不知當時二疏之去有是事否古今人同不同未可知也中世士大夫以官爲家罷則無所於歸楊侯始冠舉於其鄉歌鹿鳴而來也今之歸指其樹曰某樹吾先人之所種也某水某丘吾童子時所釣遊也鄉人莫不加敬誠子孫以楊侯不去其鄉爲法古之所謂鄉先



生沒而可祭於社者其在斯人歟其在斯人歟

送權秀才序

伯樂之廐多良馬卞和之匱多美玉卓犖瓌怪之士宜乎  
遊於大人君子之門也相國隴西公旣平汴州天子命御  
史大夫吳縣男爲軍司馬門下之士權生實從之來權生  
之貌固若常人耳其文辭引物連類窮情盡變宮商相宣  
金石諧和寂寥乎短章春容乎大篇如是者閱之累日而  
無窮焉愈常觀於皇都每年貢士至千餘人或與之遊或  
得其文若權生者百無一二焉如是而將進於明有司重  
之以吳縣之知其果有成哉於是咸賦詩以贈之

送湖南李正字序



貞元中愈從太傅隴西公平汴州。李生之尊府以侍御史管汴之鹽鐵。日爲酒殺羊享賓客。李生則尚與其弟學讀書習文辭以舉進士爲業。愈於太傅府年最少故得交李生父子間。公薨軍亂軍司馬從事皆死。侍御亦被讒爲民日南。其後五年愈又貶陽山令。今愈以都官郎守東都省。侍御自衡州刺史爲親王長史亦留此掌其府事。李生自湖南從事請告來覲於時太傅府之士惟愈與河南司錄周君獨存。其外則李氏父子相與爲四人。離十三年幸而集處得燕而舉一觴相屬。此天也。非人力也。侍御與周君於今爲先輩成德。李生溫然爲君子。有詩八百篇傳詠於時。惟愈也業不益進行不加修。顧惟未死耳。往拜侍御謁。



周君抵李生退未嘗不發媿也。往時侍御有無盡費於朋友及今則又不忍其三族之寒饑聚而館之。疏遠畢至祿不足以養。李生雖欲不從事於外其勢不可得已也。重李生之還者皆爲詩愈最故。故又爲序云。

### 送石處士序

河陽軍節度御史大夫烏公爲節度之三月求士於從事之賢者有薦石先生者。公曰先生何如。曰先生居嵩邙瀍穀之間。冬一裘夏一葛。食朝夕飯一盂。蔬一盤。人與之錢則辭。請與出游未嘗以事辭。勸之仕不應。坐一室左右圖書與之語道理。辯古今事當否。論人高下事後當成敗。若河決下流而東注。若駟馬駕輕車就熟路而王良造父爲



行事他本作行李

之先後也。若燭照數計而龜卜也。大夫曰：先生有以自老，無求於人，其肯爲某來耶？從事曰：大夫文武忠孝，求士爲國，不私於家。方今寇聚於恒，師環其疆，農不耕收，財粟殫亡。吾所處地，歸輸之塗，治法征謀，宜有所出。先生仁且勇，若以義請，而疆委重焉，其何說之辭？於是讓書詞，具馬幣。卜日以授使者，求先生之廬而請焉。先生不告於妻子，不謀於朋友，冠帶出見客，拜受書禮於門內。宵則沐浴，戒行。事載書冊，問道所由，告行於常所來往。晨則畢至，張上東門外，酒三行，且起，有執爵而言者曰：大夫真能以義取人，先生真能以道自任，決去就爲先生別。又酌而祝曰：凡去就出處，何常？惟義之歸，遂以爲先生壽。又酌而祝曰：使大



夫恒無變其初。無務富其家。而饑其師。無甘受佞人而外敬正士。無味於諂言。惟先生是聽。以能有成功。保天子之寵命。又祝曰。使先生無圖利於大夫。而私使其身圖先生起拜祝辭曰。敢不敬蚤夜以求從祝規。於是東都之人士咸知大夫與先生果能相與以有成也。遂各爲歌詩六韻。退。愈爲之序云。

### 送溫處士赴河陽軍序

伯樂一過冀北之野。而馬羣遂空。夫冀北馬多天下。伯樂雖善知馬。安能空其羣耶。解之者曰。吾所謂空。非無馬也。無良馬也。伯樂知馬。遇其良。輒取之。羣無留良馬。苟無良。雖謂無馬。不爲虛語矣。東都固士大夫之冀北也。恃才能



深藏而不市者洛之北涯曰石生其南涯曰溫生大夫烏公以鈇鉞鎮河陽之三月以石生爲才以禮爲羅羅而致之幕下未數月也以溫生爲才於是以石生爲媒以禮爲羅又羅而致之幕下東都雖信多才士朝取一人焉拔其尤暮取一人焉拔其尤自居守河南尹以及百司之執事與吾輩二縣之大夫政有所不通事有所可疑奚所諮而處焉士大夫之去位而巷處者誰與嬉遊小子後生於何考德而問業焉摺紳之東西行過是都者無所禮於其廬若是而稱曰大夫烏公一鎮河陽而東都處士之廬無人焉豈不可也夫南面而聽天下其所託重而恃力者惟相與將耳相爲天子得人於朝廷將爲天子得文武士於幕



下求內外無治不可得也愈縻於茲不能自引去資二生以待老今皆爲有力者奪之其何能無介然於懷耶生旣至拜公於軍門其爲吾以前所稱爲天下賀以後所稱爲吾致私怨於盡取也留守相公首爲四韻詩歌其事愈因推其意而序之

### 送鄭尚書序

嶺之南其州七十其二十二隸嶺南節度府其四十餘分四府府各置帥然獨嶺南節度爲大府大府始至四府必使其佐啓問起居謝守地不得卽賀以爲禮歲時必遣賀問致水土物大府帥或道過其府府帥必戎服左握刀右屬弓矢帕首袴鞬迎郊及旣至大府帥先入據館帥守屏



若將趨入拜庭之爲者。大府與之爲讓。至一再。乃敢改服。以賓主見。適位執爵。皆與拜。不許乃止。虔若小侯之事。大國有大事。諮而後行。隸府之州。離府遠者。至三千里。懸隔山海。使必數月。而後能至。蠻夷悍輕。易怨以變。其南州皆岸大海。多洲島。颿音帆風一日踔數千里。漫瀾不見蹤迹。控御失所。依險阻。結黨仇。機毒矢以待將吏。撞搪呼號以相和應。蜂屯蟻雜。不可爬梳。好則人怒。則獸故。常薄其征入。簡節而踈目。時有所遺漏。不究切之。長養以兒子。至紛不可治。乃草薶。音維而禽獮。息淺切之。盡根株痛斷乃止。其海外雜國。若耽。音耽浮羅。流求。毛人。夷。亶之州。林邑。扶南。真臘。于陀利之屬。東南際天地。以萬數。或時候風潮。朝貢。蠻胡。賈



人舶交海中。若嶺南帥得其人。則一邊盡治。不相寇盜。賊殺無風。魚之災。水旱癘毒之患。外國之貨日至。珠香象犀玳瑁奇物。溢於中國。不可勝用。故選帥常重於他鎮。非有文武威風。知大體可畏信者。則不幸往往有事。長慶三年四月。以工部尚書鄭公爲刑部尚書兼御史大夫。往踐其任。鄭公嘗以節鎮襄陽。又帥滄景德棣。歷河南尹華州刺史。皆有功德。可稱道。入朝爲金吾將軍。散騎常侍。工部侍郎。尚書家屬百人。無數畝之宅。僦屋以居。可謂貴而能貧。爲仁者不富之效也。及是命朝廷莫不悅。將行。公卿大夫士苟能詩者。咸相率爲詩。以美朝政。以慰公南行之思。韻必以來字者。所以祝公成政而來歸疾也。



送水陸運使韓侍御歸所治序

六年冬振武軍吏走驛馬詣闕告饑公卿廷議以轉運使不得其人宜選才幹之士往換之吾族子重華適當其任至則出贓罪吏九百餘人脫其桎梏給耒耜與牛使耕其傍便近地以償所負釋其粟之在吏者四十萬斛不徵吏得去罪死假種糧齒平人有以自效莫不涕泣感奮相率盡力以奉其令而又爲之奔走經營相原隰之宜指授方方法故連二歲大熟吏得盡償其所亡失四十萬斛者而私其贏餘得以蘇息軍不復饑君曰此未足爲天子言請益募人爲十五屯屯置百三十人而種百頃令各就高爲堡東起振武轉而西過雲州界極於中受降城出入河山之



際六百餘里屯堡相望寇來不能爲暴人得肆耕其中少  
可以罷漕輓之費朝廷從其議秋果倍收歲省度支錢千  
三百萬八年詔拜殿中侍御史錫服朱銀其冬來朝奏曰  
得益開田四千頃則盡可以給塞下五城矣田五千頃法  
當用人七千臣令吏於無事時督習弓矢爲戰守備因可  
以制虜庶幾所謂兵農兼事務一而兩得者也大臣方持  
其議吾以爲邊軍皆不知耕作開口望哺有司常僦人以  
車船自他郡往輸乘沙逆河遠者數千里人畜死蹄踵交  
道費不可勝計中國坐耗而邊吏恒苦食不繼今君所請  
田皆故秦漢時郡縣地其課績又已驗白若從其言其利  
未可遽以一二數也今天子方舉羣策以收太平之功寧



使士有不盡用之歎。懷竒見而不得施設也。君又何憂而中臺士大夫亦同言。侍御韓君前領三縣。紀綱三州。奏課常爲天下第一。行其計於邊。其功烈又赫赫如此。使盡用其策。西北邊故所沒地可指期而有也。聞其歸。皆相勉爲詩以推大之。而屬余爲序。

### 送鄭十爲校理序

祕書御府也。天子猶以爲外。且遠。不得朝夕視。始更聚書集賢殿。別置校讐官。曰學士。曰校理。常以寵丞相爲大學士。其他學士皆達官也。校理則用天下之名能文學者。苟在選。不計其秩次。惟所用之。由是集賢之書盛積。盡祕書所有。不能處其半。書日益多。官日益重。四年。鄭生涵始以



長安尉選爲校理人皆曰是宰相子能恭儉守教訓好古義施於文辭者如是而在選公卿大夫家之子弟其勸耳矣愈爲博士也始事相公於祭酒分教東都生也事相公於東太學今爲郎於都官也又事相公於居守三爲屬吏經時五年觀道德於前後聽教誨於左右可謂親薰而炙之矣其高大遠密者不敢隱度論也其勤已而務博施以已之有欲人之能不知古君子何如耳今生始進仕獲重語於天下而慊慊若不足真能守其家法矣其在門者可進賀也求告來寧朝夕侍側東都士大夫不得見其面於其行日分司吏與留守之從事竊載酒肴席定鼎門外盛賓客以餞之旣醉各爲詩五韻且屬愈爲序



詩

相公倦台鼎。分正新邑洛。才子富文華。校讐天祿閣。壽觴  
嘉節過。歸騎春衫薄。鳥哢音弄正交加。楊花共紛泊。親交誰  
不羨。去去翔寥廓。

韋侍講盛山十二詩序

韋侯昔以考功副郎守盛山。人謂韋侯美士。考功顯曹。盛  
山僻郡。奪所宜處。納之惡地。以枉其材。韋侯將怨且不釋  
矣。或曰不然。夫得利則躍躍以喜。不得利則戚戚以泣。若不  
可生者。豈韋侯謂哉。韋侯讀六藝之文。以探周公孔子之  
意。又妙能爲辭章。可謂儒者。夫儒者之於患難。苟非其自  
取之。其拒而不受於懷也。若築河堤以障屋霤。其容而消



之也。若水之於海，冰之於夏日，其翫而忘之，以文辭也。若奏金石以破蟋蟀之鳴，蟲飛之聲，况一不快於考功盛山，一出入息之間哉？未幾果有以韋侯所爲十二詩遺余者，其意方且以入谿谷上巖石，追逐雲月，不足日爲事，讀而歌詠之，令人欲棄百事，往而與之游，不知其出於巴東，以屬胸臆也。于時應而和者，凡十人。及此年，韋侯爲中書舍人，侍講六經禁中，和者通州元司馬爲宰相，洋州許使君爲京兆，忠州白使君爲中書舍人，李使君爲諫議大夫，黔府嚴中丞爲祕書監，溫司馬爲起居舍人，皆集闕下。於是盛山十二詩與其和者，大行於時，聯爲大卷，家有之焉。慕而爲者，將日益多，則分爲別卷，韋侯俾余題其首。



石鼎聯句詩序

元和七年十二月四日。衡山道士軒轅彌明自衡下來。舊與劉師服進士衡湘中相識。將過太白。知師服在京。夜抵其居宿。有校書郎侯喜。新有能詩聲。夜與劉說詩。彌明在其側。貌極醜。白鬚黑面。長頸而高結。喉中又作楚語。喜視之若無人。彌明忽軒衣張眉。指鑪中石鼎。謂喜曰。子云能詩。能與我賦此乎。劉往見衡湘間人說云。年九十餘矣。解捕逐鬼物。拘囚蛟螭虎豹。不知其實能否也。見其老。頗貌敬之。不知其有文也。聞此說大喜。卽援筆題其首兩句。次傳於喜。喜踴躍卽綴其下云云。道士啞然笑曰。子詩如是而已乎。卽袖手竦肩。倚北牆坐。謂劉曰。吾不解世俗書。子



爲我書。因高吟曰。龍頭縮菌蠢。豕腹漲彭亨。初不似經意。詩旨有似譏喜。二子相顧慚駭。欲以多窮之。卽又爲而傳之喜。喜思益苦。務欲壓道士。每管度欲出口。吻聲鳴益悲。操筆欲書。將下復止。竟亦不能奇也。畢卽傳道士。道士高踞大唱曰。劉把筆。吾詩云云。其不用意而功益奇。不可附說。語皆侵劉侯。喜益忌之。劉與侯皆已賦十餘韻。彌明應之如響。皆頴脫含譏諷。夜盡三更。二子思竭不能續。因起謝曰。尊師非世人也。某伏矣。願爲弟子。不敢更論詩。道士奮曰。不然。章不可以不成也。又謂劉曰。把筆來。吾與汝就之。卽又唱出四十字爲八句。書訖使讀。讀畢謂二子曰。章不已就乎。二子齊應曰。就矣。道士曰。子皆不足與語。此寧



爲文耶。吾就子所能而作耳。非吾之所學於師而能者也。吾所能者。子皆不足以聞也。獨文乎哉。吾語亦不當聞也。吾閉口矣。二子大懼。皆起立牀下拜曰。不敢他有問也。願聞一言而已。先生稱吾不解人間書。敢問解何書。請聞此而已。道士寂然若無聞也。累問不應。二子不自得。卽退就座。道士倚牆睡。鼻息如雷鳴。二子怛然失色。不敢喘。斯須曙鼓鼕鼕。形音二子亦困。遂坐睡。及覺。日已上。驚顧覓道士不見。卽問童奴曰。天且明。道士起出門。若將便旋然。奴怪久不返。卽出到門。覓無有也。二子驚惋自責。若有失者。間遂詣余言。余不能識其何道士也。嘗聞有隱君子彌明。豈其人耶。韓愈序。



石鼎聯句詩

巧匠斲山骨。剗中事煎烹。

師服

直柄未當權。塞口且吞聲。

喜

龍頭縮菌蠢。豕腹漲彭亨。

彌明

外苞乾蘚文。中有暗浪

驚

師服

在冷足自安。遭焚意彌貞。

喜

謬當鼎鼐間。妄使水

火爭。

彌明

大似烈士膽。圓如戰馬纓。

師服

上比香爐尖。下

與鏡面平。

喜

秋瓜未落蒂。凍芋強抽萌。

彌明

一塊元氣閉。

細泉幽竇傾。

師服

不值輸寫處。焉知懷抱清。

喜

方當洪鑪

然。益見小器盈。

彌明

皖皖無刃迹。團團類天成。

師服

遙疑

龜負圖。出曝曉正晴。

喜

旁有雙耳穿。上為孤髻撐。

彌明

或

訝短尾銚。又似無足鎗。

師服

可惜寒食毬。擲此傍路坑。

喜

何當出灰地。

徐也切

無計離鉗罟。

彌明

陋質荷斟酌。狹中愧

無足鎗。秦鼎曰鎗。  
有足鼎亦有足何謂  
無足鎗字



提擎

師服

豈能煮僊藥但未汙羊羹

喜

形模婦女笑度量

兒童輕

彌明

徒示堅重性不過升合盛

師服

旁似廢轂仰

側見折軸橫

喜

時於蚯蚓竅微作蒼蠅鳴

彌明

以茲翻溢

愆實負任使誠

師服

常居顧眄地敢有漏洩情

喜

寧依暖

熱弊不與寒涼并

彌明

區區徒自效瑣瑣不足呈

喜

廻旋

但兀兀開闔惟鏗鏗

師服

全勝瑚璉貴空有口傳名豈比

俎豆古不爲手所撻

除庚切

磨礱去圭角浸潤著光精願君

莫嘲誚此物方施行

彌明

韓文卷之二十一終



天啓二十一年  
吳郡王世昌  
歷古不惑千  
明國書  
天下  
...



韓文卷之二十二

祭文

祭田橫墓文

貞元十一年九月，愈如東京，道出田橫墓下，感橫義高能得士，因取酒以祭，爲文而弔之。其辭曰：事有曠百世而相感者，余不自知其何心，非今世之所稀。孰爲使余歔歔而不可禁，余旣博觀乎天下，曷有庶幾乎夫子之所爲？死者不復生，嗟余去此，其從誰？當秦氏之敗亂，得一士而可王，何五百人之擾擾，而不能脫夫子於劒鏃，抑所寶之非賢，亦天命之有常。昔闕里之多士，孔聖亦云其遑遑。苟余行之不迷，雖顛沛其何傷？自古死者非一，夫子至今有耿光。



跽陳辭而薦酒。魂髣髴而來享。

歐陽生哀辭

歐陽詹世居閩越。自詹已上皆爲閩越官。至州佐縣令者。累累有焉。閩越地肥衍。有山泉禽魚之樂。雖有長材秀民。通文書吏事。與上國齒者。未嘗肯出仕。今上初。故宰相常袞爲福建諸州觀察使。治其地。袞以文辭進。有名於時。又作大官。臨莅其民。鄉縣小民有能誦書作文辭者。袞親與之爲客主之禮。觀游宴饗。必召與之。時未幾。皆化翕然。詹于時獨秀出。袞加敬愛。諸生皆推服。閩越之人舉進士。繇詹始。建中貞元間。余就食江南。未接人事。徃徃聞詹名。閭巷間。詹之稱於江南也久。貞元三年。余始至京師。舉進士。



聞詹名尤甚。八年春，遂與詹文辭同考試，登第，始相識。自後詹歸閩中，余或在京師他處，不見詹久者，惟詹歸閩中時爲然。其他時與詹離，率不歷歲移時則必合，合必兩忘其所趨，久然後去，故余與詹相知爲深。詹事父母盡孝道，仁於妻子，於朋友義以誠，氣醇以方，容貌嶷嶷音逆然，其燕私善謔以和，其文章切深，喜往復善自道，讀其書，知其於慈孝最隆也。十五年冬，余以徐州從事朝正於京師，詹爲國子監四門助教，將率其徒伏闕下，舉余爲博士，會監有獄不果，上觀其心，有益於余，將忘其身之賤而爲之也。嗚呼詹，今其死矣。詹閩越人也，父母老矣，捨朝夕之養以來京師，其心將以有得於是而歸爲父母榮也。雖其父母之



心亦皆然。詹在側雖無離憂其志不樂也。詹在京師雖有離憂其志樂也。若詹者所謂以志養志者歟。詹雖未得位其名聲流於人人其德行信於朋友雖詹與其父母皆可無憾也。詹之事業文章李翱旣爲之傳故作哀辭以舒余哀以傳于後以遺其父母而解其悲哀以卒詹志云。求仕與友兮遠違其鄉。父母之命兮子奉以行。友則旣獲兮祿實不豐以志爲養兮何有牛羊。事實旣修兮名譽又光。父母忻忻兮常若在旁。命雖云短兮其存者長。終要必死兮願不永傷。友朋親視兮藥物甚良。飲食孔時兮所欲無妨。壽命不齊兮人道之常。在側與遠兮非有不同。山川阻深兮魂魄流行。祀祭則及兮勿謂不通。哭泣無益兮抑哀自



彊推生知死兮以慰孝誠嗚呼哀哉兮是亦難忘

題哀辭後

愈性不喜書自爲此文惟自書兩通其一通遺清河崔羣羣與余皆歐陽生友也哀生之不得位而死哭之過時而悲其一通今書以遺彭城劉君伉君喜古文以吾所謂合於古諸吾廬而來請者八九至而其色不怨志益堅凡愈之爲此文蓋哀歐陽生之不顯榮於前又懼其泯滅於後也今劉君之請未必知歐陽生其志在古文耳雖然愈之爲古文豈獨取其句讀不類於今者耶思古人而不得見學古道則欲兼通其辭通其辭者本志乎古道者也古之道不苟譽毀於人劉君好其辭則其知歐陽生也無惑焉



獨孤申叔哀辭

衆萬之生誰非天耶。明昭昏蒙誰使然耶。行何爲而怒。居何故而憐耶。胡喜厚其所可薄。而恒不足於賢耶。將下民之好惡與彼蒼懸耶。抑蒼茫無端而斲寓其間耶。死者無知。吾爲子慟而已矣。如有知也。子其自知之矣。濯濯其英。曄曄其光。如聞其聲。如見其容。烏虜遠矣。何日而忘。

祭穆員外文

於乎建中之初。予居于嵩。攜扶北奔。避盜來攻。晨及洛師。相遇一時。顧我如故。眷然顧之。子有令聞。我來自山。子之峻明。我鈍而頑。道旣云異。誰從知我。我思其厚。不知其可。於後八年。君從杜侯。我時在洛。亦應其招。留守無事。多君



子僚罔有疑忌。維其嬉游。草生之春。鳥鳴之朝。我轡在手。君揚其鑣。君居于室。我旣來卽。或以嘯歌。或以偃側。誨余以義。復我以誠。終日以語。無非德聲。主人信讒。有惑其下。殺人無罪。誣以成過。入救不從。反以爲禍。赫赫有聞。王命三司。察我于獄。相從係縲。曲生何樂。直死何悲。上懷主人。內閔其私。進退之難。君處之宜。旣釋于囚。我來徐州。道之悠悠。思君爲憂。我如京師。君居父喪。哭泣而拜。言詞不通。我歸自西。君反吉服。晤言無他。徃復其昔。不日而違。重我心惻。自後聞君母喪。是丁痛毒之懷。六年以并。孰云孝子。而殞厥靈。今我之至。入門失聲。酒肉在前。君胡不餐。升君之堂。不與我言。於乎死矣。何日來還。



祭郴州李使君文

維年月日將仕郎守江陵府法曹叅軍韓愈謹以清酌庶羞之奠敬祭于故郴州李使君之靈古語有之白頭如新傾蓋若舊顧意氣之何如何日時之足究當貞元之癸未惕皇威而左授伏荒災之下邑嗟名頹而位仆歷貴部而西邁邇清光於暫觀言莫交而情無由既不賈而奚售哀窮遐之無徒挈百憂以自副辱問訊之綢繆恒飽饑而愈疚接雄詞於章句窺逸跡於篆籀苞黃甘而致貽獲紙筆之雙貿投义魚之短韻媿韜瑕而舉秀竢新命於衡陽費薪芻於館候音控大庭以見處憇水木之幽茂逞英心於縱博沃煩腸以清酎航北湖之空明覩鱗介之驚透宴州



樓之豁達衆管啾而並奏得恩惠於新知脫窮愁於往陋  
輟行謀於俄頃見秋月之三穀逮天書之下降猶低迴以  
宿音秀留音溜念睽離之在期謂此會之難又授縞紵以託心  
示茲誠之不謬儻後日之北遷約窮歡於一晝雖掾俸之  
酸寒要拔貧而爲富何人生之難信捐斯言而莫就始訝  
信於暫踈遂承凶於不救見明旌之低昂尚遲疑於別袖  
憶交酬而迭舞奠單杯而哭柩美夫君之爲政不撓志於  
讒構遭脣舌之紛羅獨陵晨而孤雉彼憮人之浮言雖百  
車其何詬洞古往而高觀固邪正之相寇幸竊覩其始終  
敢不明白而蔽覆神乎來哉辭以爲侑尚饗

祭薛助教文



維元和四年歲次己丑後三月二十一日景寅朝散郎守  
國子博士韓愈太學助教侯繼謹以清酌之奠祭于亡友  
國子助教薛君之靈嗚呼吾徒學而不見施設祿又不足  
以活身天於此時奪其友人同官太學日得相因奈何永  
違祇隔數晨笑語爲別慟哭來門藏棺蔽帷欲見無緣皎  
皎眉目在人目前酌以告誠庶幾有神嗚呼哀哉尚饗

祭虞部張員外文

維年月日愈等謹以清酌庶羞之奠敬祭于亡友張十三  
員外之靈嗚呼往在貞元俱從賓薦司我明試時維邦彥  
各以文售幸皆少年羣游旅宿其歡甚焉出言無尤有獲  
同喜他年諸人莫有能比倏忽逮今二十餘歲存皆衰白



半亦辭世外。纏公事內。迫家私。中宵興歎。無復昔時如  
何。今者又失夫子。懿德柔聲。永絕心耳。廬親之墓。終喪乃  
歸。陽瘖避職。妻子不知。分司憲臺。風紀由振。遂遷司虞。以  
播華問。不能老壽。孰究其因。託嗣於宗。天維不仁。酒食備  
設。靈其降止。論德叙情。以視諸誄。尚饗。

祭河南張員外文

維年月日。彰義軍行軍司馬守太子右庶子兼御史中丞  
韓愈。謹遣某乙。以庶羞清酌之奠。祭于亡友故河南縣令  
張十二員外之靈。貞元十九。君爲御史。余以無能。同詔並  
時。君德渾剛。標高揭已。有不吾如。唾猶泥滓。余戇而狂。年  
未三紀。秉氣加人。無挾自恃。彼婉孌者。實憚吾曹。側肩帖



耳有舌如刀。我落陽山。以尹鼯猱。君飄臨武。山林之牢。歲

弊寒兇。雪虐風饕。顛於馬下。我泗君咷。音桃夜息南山。同臥

一席。守隸防夫。舐頂交跣。音隻洞庭漫汗。粘天無壁。風濤相

逐。

呼回切

中作霹靂。追程盲進。飄船箭激。南上湘水。屈氏所

沈。二妃行迷。淚蹤染林。山哀浦思。鳥獸呌。音余唱君和。百

篇在吟。君止于縣。我又南踰。把觥相飲。後期有無。期宿界

上。一又相語。自別幾時。遽變寒暑。枕臂欹眠。加余以股。僕

來告言。虎入廐處。無敢驚逐。以我驂。音蒙去。君云是物。不駿

於乘。虎取而往。來寅其徵。我預在此。與君俱膺。猛獸果信。

惡禱而憑。余出嶺中。君竢州下。偕掾江陵。非余望者。郴山

奇變。其水清寫。泊沙倚石。有選。音故切無捨。衡陽放酒。熊咆



庖虎皐音豪不存令章罰籌蝟毛委舟湘流往觀南嶽雲壁

潭潭穹林攸擢避風太湖七日鹿角鈎登大鮎怒頰豕狗

許角切齧盤炙酒羣奴餘啄走官階下首下尻苦刀切高下馬

伏塗從事是遭予徵博士君以使已相見京師過願之始

分教東生君掾雍首兩都相望於別何有解手背面遂十

一年君出我入如相避然生闊死休吞不復宣刑官屬郎

引章訐奪權臣不愛南昌是幹明條謹獄氓獠音老戶歌用

遷澧音禮浦爲人受瘡還家東都起令河南屈拜後生憤所

不堪屢以正免身伸事蹇竟死不昇孰勸爲善丞相南討

余辱司馬議兵大梁走出洛下哭不憑棺奠不親筆不撫

其子葬不送野望君傷懷有隕如瀉銘君之績納石壤中



爰及祖考紀德事功外著後世鬼神與通君其奚憾不余  
鑒衷嗚呼哀哉尚饗

祭左司李員外太夫人文

維年月日某官某等謹以清酌庶羞之奠敬祭于某縣太  
君鄭氏尊夫人之靈胄于茂族配此德門克成厥家享有  
全福爲婦爲母再朝中宮摺紳推榮宗黨是則某等幸隨  
令子同服官僚庶展哀誠式陳牢醴尚饗

祭薛中丞文

維年月日某官某乙等謹以清酌庶羞之奠祭于亡友故  
御史中丞贈刑部侍郎薛公之靈公之懿德茂行可以勵  
俗清文敏識足以發身宗族稱其孝慈友朋歸其信義累



昇科第。亟踐班行。左掖南臺。共傳故事。詩人墨客。爭諷新篇。羽儀朝廷。輝映中外。長途方騁。大限俄窮。聖上軫不憖之悲。具僚興云亡之歎。况某等忘言斯久。知我俱深。青春之遊。白首相失。來陳薄奠。詎盡哀誠。嗚呼哀哉。尚饗。

祭裴太常文

維年月日。愈等謹以庶羞清酌之奠。敬祭于故太常裴二十兄之靈。朝廷之重。莫過乎禮。雖經策具存。而精通蓋寡。自郊丘故事。宗廟時宜。大君之所旁求。丞相之所卒問。羣儒拱手。宗祝醉心。兄皆指陳根源。斟酌通變。莫不允符天旨。克協神休。至乎公卿冠昏。士庶喪祭。疑皆響答。問必實歸。從我者足爲軌儀。異我者無逃指笑。動爲時法。言比



古經獨立一朝高視千古而又驅馳朋執僂俛宗親擔石之儲常空於私室方丈之食每盛於賓筵贈必固辭求無不應孰云具美而不永年某等早接遊從實欽道義致誠薄奠以訣終天嗚呼哀哉尚饗

潮州祭神文五首

維年月日潮州刺史韓愈謹差攝潮陽縣尉史虛已以特羊庶羞之奠告于大湖神之靈愈承朝命爲此州長今月二十五日至治下凡大神降依庇貺斯人者皆愈所當率徒屬奔走致誠親執祀事於廟庭下今以始至方上奏天子思慮不能專一冠衣不淨潔與人吏未相識知牲糈音所酒食器皿切倉胡弊不能嚴清又未卜日時不敢薦見使



攝潮陽縣尉史虛已以告神其降監尚饗

維年月日潮州刺史韓愈謹以清酌服脩之奠祈于大湖  
神之靈曰稻旣穰矣而雨不得熟以穫也蠶起且眠矣而  
雨不得老以簇也歲且盡矣稻不可以復種而蠶不可以  
復育也農夫桑婦將無以應賦稅繼衣食也非神之不愛  
人刺史失所職也百姓何罪使至極也神聰明而端一聽  
不可濫以惑也刺史不仁可坐以罪惟彼無辜惠以福也  
劃音劃蠶音蠶雲陰卷月日也幸身有衣口得食給神役也充  
上之須脫刑辟也選牲爲酒以報靈德也吹擊管鼓侑香  
潔也拜庭跪坐如法式也不信當治疾殃殛也神其尚饗  
維年月日潮州刺史韓愈謹以柔毛剛鬣清酌庶羞之奠



祭于城隍之神。間者以淫雨將爲人災。無以應貢賦供給。神明上下獲罪罰之故。乃以六月壬子。奔走分告。乞晴于爾明神。閔人之不辜。若饗若答。冀除天地山川清風時興。白日顯行。蠶穀以登。人不咨嗟。惟神之恩。夙夜不敢忘怠。謹卜良日。躬率將吏。薦茲血毛。清酌嘉羞。侑以音聲。以謝神貺。神其饗之。

維年月日。潮州刺史韓愈。謹遣耆壽成寓。以清酌少牢之奠。告于界石神之靈。惟封部之內山川之神。克庥于人。官則置立室宇。備具服器。奠饗以時。淫雨旣霽。蠶穀以成。織婦耕男。忻忻衍衍。是神之庥庇于人也。敢不明受其賜。謹選良月吉日。齋潔以祀神。其鑒之。尚饗。



維年月日潮州刺史韓愈謹以清酌庶羞之奠祭于大湖之神惟神降依茲土以庇其人今茲無有水旱雷雨風火疾疫爲災各寧厥宇以供上役長吏免被其譴賴神之德夙夜不敢忘謹具食飲躬齋洗奏音聲以獻以樂以謝厥賜不敢有所祈尚饗

韓文卷之二十二終







韓文卷之二十三

祭文

袁州祭神文三首

維年月日袁州刺史韓愈謹告于城隍神之靈刺史無治  
行無以媚于神祇天降之罰以久不雨苗且盡死刺史雖  
得罪百姓何辜宜降疾咎于某躬無令鰥寡蒙茲濫罰  
謹告

維年月日袁州刺史韓愈謹以少牢之奠祭于仰山之神  
曰神之所依者惟人人之所事者惟神今既大旱嘉穀將  
盡人將無以爲命神亦將無所降依不敢不以告若守土  
有罪宜被疾殃於其身百姓可哀宜蒙恩閔以時賜雨使



韓文公集卷之二十三  
獲承祭不怠神亦永有飲食謹告

維年月日袁州刺史韓愈謹以少牢之奠祭于仰山之神  
曰田穀將死而神膏澤之百姓無所告而神恤之刺史有  
罪而神釋之敢不有薦也尚饗

祭柳子厚文

維年月日韓愈謹以清酌庶羞之奠祭于亡友柳子厚之  
靈嗟嗟子厚而至然邪自古莫不然我又何嗟人之生世  
如夢一覺其間利害竟亦何校當其夢時有樂有悲及其  
既覺豈足追惟凡物之生不願爲材犧罇青黃乃木之災  
子之中棄天脫馬音繫羈玉佩瓊琚大放厥辭富貴無能磨  
滅誰記子之自著表表愈偉不善爲斲血指汗顏巧匠旁



觀縮手袖間子之文章而不用世乃令吾徒掌帝之制子之視人自以無前一斤不復羣飛刺天嗟嗟子厚今也則亡臨絕之音一何琅琅徧告諸友以寄厥子不鄙謂余亦託以死凡今之交觀勢厚薄余豈可保能承子託非我知子子實命我猶有鬼神寧敢遺墮念子永歸無復來期設祭棺前矢心以辭嗚呼哀哉尚饗

祭湘君夫人文

維元和十五年歲次庚子十月某日朝散大夫守國子祭酒護軍賜紫金魚袋韓愈謹使前袁州軍事判官張得一以清酌之奠敢昭告于湘君湘夫人二妃之神前歲之春愈以罪犯黜守潮州懼以譴死且虞海山之波霧瘴毒爲



災以殞其命。舟次祠下。是用有禱于神。神享其衷。賜以吉  
卜。曰。如汝志。蒙神之福。啓帝之心。去潮即表。今又獲位於  
朝。復其章綬。退思往昔。實發夢寐。凡卅年於今。乃合夙夜  
怵惕。敢忘神之大庇。伏以祠宇毀頓。憑附之質。丹青之飾。  
暗昧不圭。不稱靈明。外無四垣。堂陛頽落。牛羊入室。居民  
行商。不來祭享。輒敢以私錢十萬。脩而作之。舊碑斷折。其  
半仆地。文字缺滅。幾不可讀。謹脩而樹之。廟成之後。將求  
玉石。仍刻舊文。因銘其陰。以大振顯君夫人之威神。以報  
靈德。俾民承事萬世不怠。惟神其鑒之。尚饗。

始將旣脩樹舊碑。仍刻其文於新石。因銘其陰。舊碑石  
旣多破落。文不可盡識。移之於新。或失其真。遂不復刻。



祭竇司業文

維年月日兵部侍郎韓愈謹以清酌庶羞之奠祭于故國  
子司業竇君二兄之靈惟君文行夙成有聲江東魁然厚  
重長者之風一舉於鄉遂收厥功屢佐大侯以調兵戎詔  
曰予虞汝爲郎中乃令洛陽歲且四終惟刑之慎掌正隸  
僮命守高平命副儒宮朱衣銀魚象服以崇錫榮考妣孝  
道上窮官不滿能亦云達通踰七望八年孰非翁在君無  
憾我意不克君之昆弟三以辭雄刺史郎中四繼三同於  
士大夫可謂顯融我之獲見實自童蒙旣愛旣勸在麻之  
蓬自視雛鷇音寇望君飛鴻四十年餘事如夢中分宰河洛  
媿立竝躬俱官於學以纖臨洪惠詩不酬報德以空死生



莫接孰明我衷於祭告情文以自攻嗚呼哀哉尚饗

祭侯主簿文

維年月日吏部侍郎韓愈謹遣男殿中省進馬佶致祭于  
亡友故國子主簿侯君之靈嗚呼惟子文學今誰過之子  
於道義罔不捨遺我狎我愛人莫與夷自始及今二紀于  
茲我或爲文筆俾子持唱我和我問我以疑我釣我遊莫  
不我隨我寢我休莫爾之私朋友昆弟情敬異施惟我於  
子無適不宜棄我而死嗟我之衰相好滿目少年之時日  
月云亡今其有誰誰不富貴而子爲羈我無利權雖怨曷  
爲子之方塋我方齋祠哭送不可誰知我悲嗚呼哀哉尚  
饗



祭竹林神文

維年月日京兆尹兼御史大夫韓愈謹以酒脯之奠再拜  
稽首告于竹林之神曰天子不以愈爲愚不能使尹茲大  
衆二十三縣之人今農旣勤於稼有苗盈野而天不雨將  
盡槁以死農將無所食鬼神將無以爲饗國家之禮天地  
百祀神祇不失其常惠天之人不失其和人又無罪何爲  
造茲旱虐以罰也將俾尹者不仁不明不能承帝之勅以  
化正其下聞音問無香惟腥神于惠罰無差施罪瘠于尹愈  
身是甘是宜雨則時降神無爽其聰明永饗于人無媿尚  
饗

曲江祭龍文



維年月日京兆尹兼御史大夫韓愈謹以香果之奠敢昭告于東方青龍之神天作旱災嘉穀將槁乃於甲乙之日依准古法作神之象齋戒祀禱神其享祐之時降甘雨以惠茲人急急如律令

祭馬僕射文

維年月日吏部侍郎韓愈謹以清酌庶羞之奠敬祭于故僕射馬公十二兄之靈惟公弘大溫恭全然德備天故生之其必有意將明將昌實艱初試佐戎滑臺斥由尹寺適彼歐閭餽音飢跋躓顛而不踣乃得其地于泉于虔始執郡符遂殿交州抗節番禺去其螟蠹蠻越大蘇擢亞秋官朝得碩士人謂其崇我勢始起東征淮蔡相臣是使公



兼邦憲以副經紀殲彼大魁厥勳孰似丞相歸治留長蔡  
師茫茫黍稷昔實棘茨鳩鳴雀乳不見梟鴟惟蔡及許舊  
爲血仇命公并侯耕借之牛束其弓矢禮讓優優始誅鄆  
音運戎厥墟腥臊公往滌之茲惟樂郊惟東有淝音制惟西有  
虺顛覆朋鄰我餘有幾律音律萃慈恤切中居斬其脊尾岱定  
河安惟公之躋帝念厥功還公于朝陟于地官且長百僚  
度彼四方孰樂可據顧瞻衡釣將舉以付惟公積勤以疾  
以憂及其歸時當謝之秋賀門未歸弔廬已萃朱燕于堂  
已哭于次昔我及公實同危事且死且生誓莫捐棄歸來  
握手曾不三四曾不濡翰酬酢文字曾不醉飽以勸酒哉  
側吏切莫以叙哀其何能致嗚呼哀哉尚饗



弔武侍御所畫佛文

御史武君當年喪其配歛其遺服櫛珥音輓盤音輓于篋月旦十五日則一出而陳之抱嬰兒以泣有爲浮屠之法者造武氏而諭之曰是豈有益邪吾師云人死則爲鬼鬼且復爲人隨所積善惡受報環復不窮也極西之方有佛焉其土大樂親戚姑能相爲圖是佛而禮之願其往生莫不如意武君憮然辭曰吾儒者其可以爲是旣又逢月旦十五日復出其篋實而陳之抱嬰兒以泣且殆而悔曰是真何益也吾不能了釋氏之信不又安知其不果然乎於是悉出其遺服櫛佩合若干種就浮屠師請圖前所謂佛者浮屠師受而圖之韓愈聞而弔之曰哲哲今日存丁寧今耳



言忽不見兮不聞莽誰窮兮本源圖西佛兮道予懃以妄  
塞悲兮慰新魂嗚呼奈何兮弔以茲文

祭故陝府李司馬文

維年月日守國子祭酒賜紫金魚袋韓愈謹以清酌奠祭  
于故陝府左司馬李公之靈曰公學以爲耕文以爲穫發  
憤孤身復續厥家選于吏部亟以科進歷臨大邑惟政有  
聲遂承宗正日朝帝庭出輔陝都吏畏僚慕子婦諸孫盈  
于室堂公姑悅喜五福具有大夫士家孰不榮美如何不  
常以至大故嗚呼哀哉愈以守官不獲弔送昏姻之好以  
哀以悲敬致微禮公其歆之尚饗

祭十二兄文



月日從父弟某官某乙謹以清酌庶羞之奠敢昭告于十  
二兄故號州司戶府君之靈嗚呼維我皇祖有孫八人惟  
兄與我後死孤存奈何於今又棄而先生不偕居疾藥不  
親歛不摩棺瘞不繞墳趨奔束制生死虧恩歸女教男反  
骨本原其不有年以補我愆長號送哀以薦此文尚饗

### 祭鄭夫人文

維年月日愈謹於逆旅備時羞之奠再拜頓首敢昭告于  
六嫂滎陽鄭氏夫人之靈嗚呼天禍我家降集百殃我生  
不辰三歲而孤蒙幼未知鞠我者兄在死而生實維嫂恩  
未齒初斲切一年兄宦王官提携負任去洛居秦念寒而衣  
念饑而飧疾疹音疾水火無災及身劬勞閔閔保此愚庸年



方及紀荐及凶屯兄罹讒口承命遠遷窮荒海隅天閼百  
年萬里故鄉幼孤在前相顧不歸泣血號天微嫂之力化  
爲夷蠻水浮陸走舟旄翩然至誠感神返葬中原旣克反  
葬遭時艱難百口偕行避地江濱春秋霜露薦敬蘋蘩以  
享韓氏之祖考曰此韓氏之門視余猶子誨化諄諄爰來  
京師年在成人屢貢于王名廼有聞念茲顛頑非訓曷因  
感傷懷歸隕涕熏心苟容躁進不顧其躬祿仕而還以爲  
家榮奔走乞假東西北南孰云此來廼睹靈車有志弗及  
長負殷勤嗚呼哀哉昔在韶州之行受命于元兄曰爾幼  
養于嫂喪服必以朞今其敢忘天實臨之嗚呼哀哉日月  
有時歸合塋封終天永辭絕而復蘇伏惟尚饗



祭十二郎文

年月日。季父愈聞汝喪之七日。乃能銜哀致誠。使建中遠具時羞之奠。告汝十二郎之靈。嗚呼。吾少孤。及長。不省所怙。惟兄嫂是依。中年兄歿南方。吾與汝俱幼。從嫂歸葬河陽。旣又與汝就食江南。零丁孤苦。未嘗一日相離也。吾上有三兄。皆不幸早世。承先人後者。在孫惟汝。在子惟吾。兩世一身。形單影隻。嫂常撫汝。指吾而言曰。韓氏兩世惟此而已。汝時尤小。當不復記憶。吾時雖能記憶。亦未知其言之悲也。吾年十九。始來京城。其後四年而歸視汝。又四年。吾往河陽省墳墓。遇汝從嫂喪來葬。又二年。吾佐董丞相于汴州。汝來省吾。止一歲。請歸取其孥。明年丞相薨。吾去



汴州汝不果來是年吾佐戎徐州使取汝者始行吾又罷去汝又不果來吾念汝從于東東亦客也不可以久圖久遠者莫如西歸將成家而致汝嗚呼孰謂汝遽去吾而歿乎吾與汝俱少年以爲雖暫相別終當久與相處故捨汝而旅食京師以求斗斛之祿誠知其如此雖萬乘之公相吾不以一日輟汝而就也去年孟東野往吾書與汝曰吾年未四十而視茫茫而髮蒼蒼而齒牙動搖念諸父與諸兄皆康彊而早世如吾之衰者其能久存乎吾不可去汝不肯來恐旦暮死而汝抱無涯之戚也孰謂少者歿而長者存彊者夭而病者全乎嗚呼其信然邪其夢邪其傳之非邪貞邪信也吾兄之盛德而天其嗣乎汝之純明而不



克蒙其澤乎。少者彊者而夭歿。長者衰者而存全乎。未可  
以爲信也。夢也。傳之非其真也。東野之書。耿蘭之報。何爲  
而在吾側也。嗚呼。其信然矣。吾兄之盛德而夭其嗣矣。汝  
之純明宜業其家者。不克蒙其澤矣。所謂天者。誠難測。而  
神者。誠難明矣。所謂理者。不可推。而壽者。不可知矣。雖然  
吾自今年來。蒼蒼者。或化而爲白矣。動搖者。或脫而落矣。  
毛血日益衰。志氣日益微。幾何不從汝而死也。死而有知  
其幾何。離其無知。悲不幾時。而不悲者。無窮期矣。汝之子  
始十歲。吾之子始五歲。少而彊者。不可保。如此孩提者。又  
可冀其成立耶。嗚呼。哀哉。嗚呼。哀哉。汝去年書云。比得軟  
脚病。徃徃而劇。吾曰。是疾也。江南之人。常常有之。未始以



爲憂也。嗚呼其竟以此而殞其生乎。抑別有疾而至斯乎。汝之書六月十七日也。東野云。汝歿以六月二日。耿蘭之報無月日。蓋東野之使者不知問家人以月日。如耿蘭之報。不知當言月日。東野與吾書。乃問使者。使者妄稱以應之耳。其然乎。其不然乎。今吾使建中祭汝。弔汝之孤。與汝之乳母。彼有食可守以待終喪。則待終喪而取以來。如不能守以終喪。則遂取以來。其餘奴婢。並令守汝喪。吾力能改葬。終葬汝於先人之兆。然後惟其所願。嗚呼。汝病吾不知時。汝歿吾不知日。生不能相養以共居。歿不能撫汝以盡哀。歛不憑其棺。窆不臨其穴。吾行負神明而使汝夭。不孝不慈而不得與汝相養以生。相守以死。一在天之涯。一



在地之角。生而影不與吾形相依。死而魂不與吾夢相接。吾實爲之。其又何尤。彼蒼者天。曷其何極。自今已往。吾其無意於人世矣。當求數頃之田。於伊潁之上。以待餘年。教吾子與汝子。幸其成長。吾女與汝女。待其嫁。如此而已。嗚呼。言有窮而情不可終。汝其知也邪。其不知也邪。嗚呼哀哉。尚饗。

祭周氏姪女文

維年月日十八叔叔母具時羞清酌之奠。祭于周氏二十娘子之靈。嫁而有子。女子之慶。纏疾中年。又命不永。今當長歸。與一世違。凡汝親戚。孰能不哀。撰此酒食。以與汝訣。汝曾知乎。我念曷闕。尚饗。



祭滂文

維年月日十八翁及十八婆盧氏以清酌庶羞之奠祭于二十三郎滂之靈曰汝聰明和順出於輩流彊記好文又少與比將謂成長以興吾家如何不祥未冠而夭吾與盧氏痛傷可言思母之恩連呼以絕執兄之手勉以無悲情一何長命一何短權塋遠地孤魂無依瀝酒告情哀何有極尚饗

祭李氏二十九娘子文

維年月日十八叔翁及十八叔婆盧氏遣昶以庶羞之奠祭于李氏二十九娘之靈曰汝之警敏和靜人莫及之姿相豐端不見闕虧幼而孤露其然何爲出從于人旣相諧



熙又暴以天神何所疵生殺減益竟誰主尸我哀汝母孰  
慰窮嫠我憐汝兒誰與抱持念此傷心不能去離奠以送  
汝知乎不知尚饗

祭張給事文

維年月日兵部侍郎韓愈謹以清酌之奠祭于故殿中侍  
御史贈給事中張君之靈惟君之先以儒名家逮君皇考  
再振厥華鄉貢進秀有司第之從事元戎謹職以治遂拜  
郎官以職王憲不長其年飛不盡翰乃生給事松貞玉剛  
幹父之業纂文有光屢辟侯府亦佐梁師前人是似耄吏  
嗟咨御史闕人奪之於朝大厦之構斧斤未操府遷幽都  
頑悖未孚繫君之賴乃奏乞留乃遷殿中朱衣象版惟義



之趨豈利之踐虺豺發釁闔府屠割償其恨犯君獨高脫  
露刃成林弓矢穰穰千萬爲徒譟謹爲狂君獨叱之上不  
負汝爲此不祥將死無所雖愚何知慙屈變色君義不辱  
殺身就德天子嘉之贈官近侍歸於一死萬古是記我之  
從女爲君之配君於其家行實高世無所於塋輿魂東歸  
誄以贈之莫知我哀嗚呼哀哉尚饗

### 祭女孀女文

維年月日阿爹阿八使汝姝以清酒時果庶羞之奠祭于  
第四小娘子孀子之靈嗚呼昔汝疾極值吾南逐蒼黃分  
散使女驚憂我視汝顏心知死隔汝視我面悲不能啼我  
旣南行家亦隨譴扶汝上輿走朝至暮天雪冰寒傷汝羸



肌撼頓險阻不得少息不能食飲又使渴饑死于窮山實  
非其命不免水火父母之罪使汝至此豈不緣我草塋路  
隅棺非其棺旣瘞遂行誰守誰瞻魂單骨寒無所託依人  
誰不死於汝即寃我歸自南乃臨哭汝汝目汝面在吾眼  
傍汝心汝意死死可忘逢歲之吉致汝先墓無驚無恐安  
以即路飲食芳甘棺輿華好歸于其丘萬古是保尚饗

韓文卷之二十三終



韓文卷之二十四

碑誌

李元賓墓銘

李觀字元賓其先隴西人也始來自江之東年二十四舉進士三年登上第又舉博學宏辭得太子校書又一年年二十九客死于京師既歛之三日友人博陵崔弘禮葬之于國東門之外七里鄉曰慶義原曰嵩原友人韓愈書石以誌之辭曰

已虜元賓壽也者吾不知其所慕夭也者吾不知其所惡生而不淑孰謂其壽死而不朽孰謂之夭已虜元賓才高乎當世而行出乎古人已虜元賓竟何爲哉竟何爲哉



崔評事墓銘

君諱翰字叔清博陵安平人曾大父知道仕至大理司直大父玄同爲刑部侍郎出刺徐相州父倚舉進士天寶之亂隱居而終君旣喪厥父攜扶孤老託于大江之南卒喪通儒書作五字句詩敦行孝悌詠諧縱譎卓詭不羈又善飲酒江南人士多從之遊貞元八年君生四十七年矣自江南應節度使王栖曜命于鄜州旣至表授右衛冑曹參軍實參幕府事直道正言補益弘多旣去職遂家于汝州汝州刺史吳郡陸長源引爲防禦判官表授試大理評事十二年相國隴西公作藩汴州而吳郡爲軍司馬隴西公以爲吳郡之從則賢也署爲觀察巡官實掌軍田鑿澮溝



斬菱茅爲陸田千二百頃水田五百頃連歲大穰軍食以饒幕府以其功狀聞使者未復命以十五年正月五日寢疾終于家年五十有六矣隴西公賻贈有加自始有疾吳郡率幕府寮屬日一至其廬問焉其旣甚也日再徃問焉其終也徃哭焉比小歛大歛三哭焉於歛之二十日其妻與其子以君之喪旋葬于汝州其二月某日遂葬于某縣某鄉某原君內仁九族外盡賓客于其所止其來如歸苟親矣雖不肖收之如賢苟賢矣雖貧賤待之如貴人是故其歿也其弔者與其哭者其聲也必哀盡焉妻鄭氏也有子二人女一人吾聞位不稱德者有後嗚呼君其終有後乎銘曰



朝之言嘻嘻夕之言怡怡偕入而出乘馬馳一日不見而死吁其悲

施先生墓銘

貞元十八年十月十一日太學博士施先生士丐卒其寮大原郭伉買石誌其墓昌黎韓愈爲之辭曰

先生明毛鄭詩通春秋左氏傳善講說朝之賢士大夫從而執經考疑者繼于門大學生習毛鄭詩春秋左氏傳者皆其弟子貴游之子弟侍先生之說二經來太學帖帖坐諸生下恐不卒得聞先生死二經生喪其師仕於學者亡其朋故自賢士大夫老師宿儒新進小生聞先生之死哭泣相弔歸衣服貨財先生年六十九在太學者十九年由



四門助教爲太學助教。由助教爲博士。太學秩滿當去。諸生輒拜䟽乞留。或留或遷。凡十九年不離太學。祖曰旭。袁州宜春尉。父曰姁。丑畧切豪州定遠丞。妻曰大原王氏。先生先卒。子曰友直。明州鄞縣主簿。曰友諒。太廟齋郎。系曰先生之祖。氏自施。父其後施。常事孔子以彰。雖爲博士。延爲大尉。大尉之孫始爲吳人。曰然。曰續。亦載其跡。先生之興公車。是召纂序前聞。于光有曜。古聖人言其旨密微。箋注紛羅。顛倒是非。聞先生講論。如客得歸。卑讓肫肫。出言孔揚。今其死矣。誰嗣爲宗。縣曰萬年。原曰神禾。高四尺者。先生墓耶。

考功員外盧君墓銘



愈之宗兄故起居舍人君。以道德文學伏一世。其友四人。其一范陽盧君東美。少未出仕。皆在江淮間。天下大夫士謂之四夔。其義以爲道可與古之夔皐者侔。故云爾。或曰。夔嘗爲相。世謂相夔四人者。雖處而未仕。天下許以爲相。故云。大曆初。御史大夫李栖筠由工部侍郎爲浙西觀察使。當是時。中國新去亂。仕多避處江淮間。嘗爲顯官得名聲。以老故自任者。以千百數。大夫莫之取。獨晨衣朝服從騎吏入下里舍。請盧君。君時始任戴冠。通詩書。與其群日講說。周公孔子。以相磨礱浸灌。婆娑嬉游。未有捨所爲爲人意。旣起從大夫。天下未知君者。惟竒大夫之取人也不常。必得人。其知君者。謂君之從人也非其常。守必得其從。



其後爲太常博士監察御史河南府司錄考功員外郎年若干而終在官舉其職夫人李姓隴西人君在配君子無違德君沒訓子女得母道甚後君二十年年六十六而終將合塋其子暢命其孫立曰乃祖德烈靡不聞然其詳而信者宜莫若吾先人之友先人之友無在者起居丈有季曰愈能爲古文業其家是必能道吾父事業汝其往請銘焉立于是奉其父命奔走來告愈謂立曰子來宜也行不可一二舉且吾之生也後不與而祖接不得詳也其大者莫若衆所與觀所與衆寡茲可以審其德矣乃祖未出而處也天下大夫士以爲與古之變臯者侔且可以爲相其德不旣大矣乎講說周公孔子樂其道不樂從事於俗得



所從不擇外內奮而起其進退不旣合於義乎銘如是可  
以示于今與後也歟立拜手曰唯唯君祖子輿濮州濮陽  
令父同舒州望江令夫人之祖延宗鄆州司馬父進成鄆  
州洛交令男三人暢申易女三人皆嫁爲士人妻墓在河  
南緱氏縣梁國之原其年月日元和二年二月十日云

施州房使君鄭夫人殯表

夫人之先出于周以鄭爲氏因初侯曾祖諱隨祖諱玠厥  
考諱絳咸垂休歸于房宗生九子左右忝稷祠春秋道順  
德嚴顯且裕宜壽而富今何謬永貞冬至前四日寓殯墳  
此非其丘

清邊郡王揚燕奇碑文



公諱燕奇字燕奇弘農華陰人也。大父知古祁州司倉。烈考文誨。天寶中實爲平盧衙前兵馬使。位至特進。檢校太子賓客。封弘農郡開國伯。世掌諸蕃互市。恩信著明。夷人慕之。祿山之亂。公年幾二十。進言于其父曰。大人守官。宜不得去。王室在難。其行矣。其父爲之請于戎帥。遂率諸將校之子弟各一人。間道趨闕。變服詭行。日倍百里。天子嘉之。特拜左金吾衛大將軍。員外置賜。勳上柱國。寶應二年春。詔從僕射田公平劉展。又從下河北。大曆八年。帥師納戎帥勉于滑州。九年。從朝于京師。建中二年。城汴州。功勞居多。三年。從攻李希烈。先登。貞元二年。從司徒劉公復汴州。十二年。與諸將執以城叛者。歸之于京師。事平。授御



史大夫食實封百戶。賜繒綵有加。十四年年六十一。五月某日終于家。自始命左金吾大將軍。凡十五遷爲御史大夫。職爲節度押衙右廂兵馬使兼馬軍先鋒兵馬使。階爲特進。勳爲上柱國。爵爲清邊郡王。食虛邑自三百戶至三千戶。直食五百戶。終焉。公結髮從軍四十餘年。敵攻無堅。城守必完。臨危蹈難。歔歔感發。乘機應會。捷出神怪。不畏義死。不榮幸生。故其事君無疑行。其事上無間言。初僕射田公其母隔于冀州。公獨請往迎之。經營賊城。出入死地。卒致其母。田公德之。約爲父子。故公始姓田氏。田公終而後復其族焉。嗣子通王屬良禎。以其年十月庚寅葬公于開封縣魯陵岡隴西郡夫人李氏祔焉。夫人清夷郡太守



祐之孫漁陽郡長史獻之女柔嘉淑明先公而殂有男四人女三人後夫人河南郡夫人雍氏某官之孫某官之女有男一人女二人咸有至性純行夫人同仁均養親族不知異焉君子于是知楊公之德又行于家也銘曰烈烈大夫逢時之虞感泣辭親從難于秦維茲爰始遂勤其事四十餘年或裨或專攻牢保危爵位已躋旣明且慎終老無隳魯陵之岡蔡河在側丞丞孝子思顯勲績斷石于此式垂後嗣

河南少尹裴君墓誌銘

公諱復字茂紹河東人曾大父元簡大理正大父曠御史中丞京畿採訪使父虬以有氣略敢諫諍爲諫議大夫引



正大疑有寵代宗朝屢辭官不肯拜卒贈工部尚書公舉  
賢良拜同官尉僕射南陽公開府徐州召公主書記三遷  
至侍御史入朝歷殿中侍御史累遷至刑部郎中疾病改  
河南少尹興至官若干日卒實元和三年四月二十三日  
享年五十夫人博陵崔氏少府監頤音挺之女男三人璟質  
皆旣冠其季始六歲曰亥郎卜葬得公卒之四月壬寅遂  
以其日葬東都芒山之陰杜翟村公幼有文年十四上時  
雨詩代宗以爲能將召入爲翰林學士尚書公請免曰願  
使卒學丁後母喪上使臨弔又詔尚書公曰父忠而子果  
孝吾加賜以厲天下終喪必且以爲翰林其在徐州府能  
勤而有勞在朝以恭儉守其職居喪必有聞待諸弟友以



善教館嫠妹畜孤甥能別而有恩歷十一官而無宅于都無田於野無遺資以爲葬斯其可銘也已銘曰

裴爲顯姓入唐尤盛支分族離各爲大家惟公之系德隆位細曰子曰孫厥聲世繼晉陽之色愉愉翼翼無外無私幼壯若一何壽之不遐而祿之不多謂必有後其又信然耶

國子助教河東薛君墓誌銘

君諱公達字大順薛姓曾祖曰希莊撫州刺史贈大理卿祖曰元暉果州流溪縣丞贈左散騎常侍父曰播尚書禮部侍郎侍郎命君後兄據據爲尚書水部郎中贈給事中君少氣高爲文有氣力務出于奇以不同俗爲主始舉進



士不與先輩揖作胡馬及圓丘詩京師人未見其書皆口相傳以熟及擢第補家令主簿佐鳳翔軍軍帥武人君爲作書奏讀不識句傳一幕以爲笑不爲變後九月九日大會射設標的高出百數十尺令曰中酬錦與金若干一軍盡射莫能中君執弓罾二矢指一矢以興揖其帥曰請以爲公歡遂適射所一座皆起隨之射三發連三中的壞不可復射中輒一軍大呼以笑連三大呼笑帥益不喜即自免去後佐河陽軍任事去害興利功爲多拜協律郎益棄奇與人爲同今天子修太學官有公卿言詔拜國子助教分教東都生元和四年年卅七二月十四日疾暴卒君再娶初娶琅邪王氏後娶京兆韋氏凡產四男五女男生輒



即死。自給事至君後，再絕。皆有名。遺言曰：以公儀之子，已後我。其年閏三月廿一日，第試太子通事舍人。公儀京兆府司錄公幹，以君之喪歸，以五月十五日葬于京兆府萬年縣少陵原，合祔王夫人塋。銘曰：宦不遂，歸譏於時，身不得年。又將尤誰？世再絕而紹祭，以不墮。

監察御史元君妻京兆韋氏夫人墓誌銘

夫人諱叢，字茂之，姓韋氏。其上七世祖父封龍門公，龍門之後世率相繼爲顯官。夫人曾祖父諱伯陽，自萬年令爲太原少尹，副留守北都，卒，贈秘書監。其大王父迢以都官郎爲嶺南軍司馬，卒，贈同州刺史。王考夏卿以太子少保



卒贈左僕射。僕射娶裴氏，皐女。皐爲給事中，皐父宰相耀卿夫人於僕射爲季女，愛之。選壻，得今御史河南元禎。禎時始以選校書秘書省中，其後遂以能直言策第一，拜左拾遺。果直言失官，又起爲御史，舉職無所顧。夫人固前受教於賢父母，得其良夫，又及教於先姑氏，率所事所言皆從。儀灋年二十七，以元和四年七月九日卒。卒三月，得其年之十月十三日葬咸陽，從先舅姑兆。銘曰：

詩歌碩人，爰叙宗親。女子之事，有以榮身。夫人之先，累公累卿。有赫外祖，相我唐明。歸逢其良，夫夫婦婦。獨不與年，而卒以夭。實生五子，一女之存。銘于好辭，以永於聞。

韓文卷之二十四終



韓文卷之二十五

碑誌

登封縣尉盧殷墓誌

元和五年十月日。范陽盧殷。以故登封縣尉卒。登封年六十五。君能爲詩。自少至老。詩可錄傳者。在紙凡千餘篇。無書不讀。然止用以資爲詩。與諫議大夫孟簡。協律孟郊。監察御史馮宿。好期相推挽。卒以病不能爲官。在登封。盡寫所爲詩。抵故宰相東都留守鄭公餘慶。留守數以帛米周其家。書薦宰相。宰相不能用。竟饑寒死。登封將死。自爲書告留守與河南尹。乞葬已。又爲詩。與常所來往河南令韓愈曰。爲我具棺。留守尹爲具。凡葬事。韓愈與買棺。又爲作



銘十一月某日葬嵩下鄭夫人墓中。君始娶滎陽鄭氏。後娶隴西李氏。生男輒死。卒無子女。一人學浮屠法。不嫁。爲比丘尼云。

興元少尹房君墓誌

房故爲官族。稱世有人。自太尉瑄以德行爲相。相玄宗肅宗。名聲益彰。徹大行。世號其門爲太尉家。宗族子弟皆法象其賢。公曾祖諱玄靜。尚書膳部郎中。歷資簡涇隰四州刺史。太尉之叔父也。祖諱肱。爲號州司馬。父諱巖。都水使者。皆名能守家法。公諱武。字某。以明經歷官。至興元少尹。謹飭畏慎。年七十三。以其官終。幼壯爲良子弟。老爲賢父兄。歷十二官。處事無纖毫過差。嘗以殿中侍御史副丹陽。



軍使其後爲蓋

音

屋

音

令施州刺史丹陽蓋屋施州吏民

至今思之娶滎陽鄭氏女生男六人其長曰次卿次卿有大才不能俯仰順時年四十餘尚守京兆興平尉然其友皆曰房氏有子也次曰次公次膺次回次衡次元始學而未仕女三人皆嫁爲士人妻初公之在施州夫人卒焉殯于江陵元和五年次卿與其羣弟奉公之喪自興元至堂殯於伊水之南六年正月次公奉夫人之喪自江陵至遂以其月十四日合葬河南緱氏之高龍原公母弟式自給事中爲河南尹孝友慈良盡費其財以奉公葬未葬之一月詔以河南爲御史中丞領宣州觀察使將行召河南令韓愈泣謂曰吾兄之葬於是而吾爲尹於是吾以爲得盡



其道於吾兄也。今壓於上命，不得視吾兄之棺入此土也。豈非天邪？子與吾兒次卿游，我重知子。凡吾兄之終事，將子是託焉。愈既不獲辭，既助其凡役事，退又爲銘云：有位有年，有弟有子。從先人葬，是謂受祉。

河南少尹李公墓誌銘

元和七年二月一日，河南少尹李公卒，年五十八。歛之三月某甲子，葬河南伊闕鳴皋山下。前事之月，其子道敏哭再拜，授使者公行狀，以幣走京師，乞銘於博士韓愈。曰：少尹將以某月日葬，宜有銘。其不肖嗣道敏杖而執事，不敢違次，不得跣以請。愈曰：公行應銘法。子又禮葬，敢不諾。而銘諸。公諱素，字某，生七歲喪其父，貧不能家。母夫人提以



歸教育于其外氏以明經選主號之弘農簿又尉陝之芮城李丞相泌觀察陝號以材署運使從事以課遷尉京兆鄠音戶考滿以書判出其倫選主萬年簿而母夫人固在食其祿母夫人卒三年改尉長安遷監察御史奏貶九卿一人改詹事丞遷殿中侍御史由度支員外郎選令萬年公主奪驛田京兆尹符縣割界之公不與改度支郎中使侍郎介恃不禮其屬大夫士擅喜怒賞罰公獨入讓不受劉闢平上以蜀賞高崇文尚書省以崇文幕府爭鹽井因革便不便命公使崇文崇文命幕府唯公命從卽其日事已疏奏侍郎外稱其能竟坐前敢抗已衢州饑擇刺史侍郎曰莫如郎李某遂刺衢州至一月遷蘇州李錡前反權將



之戍諸州者。刺史至歛手無敢與敵。公至十二日。錡反。公將左右與賊戰州門。不勝。賊呼入。公端立。責以義。皆歛兵立不逼。錡命械致公軍。將斬以徇。及境。錡適敗縛。公脫械還走州。賊急卒不暇走死。民抱扶迎盡出。天子使貴人持紫衣金魚以賜。居三年。州稱治。拜河南少尹。行大尹事。呂氏子炅。古迥切棄其妻。著道士衣冠。謝母曰。當學僊。王屋山去數月復出。間請公。公立之府門外。使吏卒脫道士冠。給冠帶。送付其母。黜屬令二人。以賊減民賦錢歲五十萬。請緩民輸期一月。詔天下輸皆緩一月。公一斷治不收聲。事常出名上。曾祖弘泰。簡州刺史。祖乾秀。伊闕令。父燮。宣州長史。贈絳州刺史。母夫人燉煌張氏。其舅參有大名。公之



配曰彭城劉氏夫人夫人先卒其葬以夫人祔夫人曾祖曰子玄祖曰餗皆有大名公之子男四人長曰道敏舉進士其次曰道樞其次曰道本道易皆好學而文女一人嫁蘇之海鹽尉韋潛自簡州而下皆葬鳴臯山下銘曰高其山而坎其中以爲公之宮奈何乎公

集賢院校理石君墓誌銘

君諱洪字濬川其先姓烏石蘭九代祖猛始從拓

音拔蒲托撥

切氏入夏居河南遂去烏與蘭獨姓石氏而官號大司空後七世至行襲官至易州刺史於君爲曾祖易州生婺州金華令諱懷一卒葬洛陽北山金華生君之考諱平爲太子家令葬金華墓東而尚書水部郎劉復爲之銘君生七



年喪其母九年而喪其父能力學行去黃州錄事叅軍則不仕而退處東都洛上十餘年行益修學益進交游益附聲號聞四海故相國鄭公餘慶留守東都上言洪可付史筆李建拜御史崔周禎爲補闕皆舉以讓宣歙池之使與浙東使交牒署君從事河陽節度烏大夫重胤間以幣先走廬下故爲河陽得佐河陽軍吏治民寬考功奏從事考君獨於天下爲第一元和六年詔下河南徵拜京兆昭應尉校理集賢御書明年六月甲午疾卒年四十二娶彭城劉氏女故相國晏之兄孫生男二人八歲曰壬四歲曰申女子二人顧言曰葬死所七月甲申葬萬年白鹿原旣病謂其游韓愈曰子以吾銘銘曰



生之艱成之又艱若有以爲而止於斯。

唐故江西觀察使韋公墓誌銘

公諱丹字某姓韋氏六世祖孝寬任周有功以公開號於  
鄖鄖公之子孫世爲大官唯公之父政卒雒縣丞贈號州  
刺史公旣孤以甥孫從太師魯公貞卿學太師愛之舉明  
經第選授峽州遠安令以讓其庶兄入紫閣山事從父熊  
通五經登科歷校書郎咸陽尉佐邠寧軍自監察御史爲  
殿中侍御史徵拜太子舍人益有名遷起居郎吳少誠襲  
許州拜河陽行軍司馬未行少誠死改駕部員外郎新羅  
國君死公以司封郎中兼御史中丞紫衣金魚往弔立其  
嗣故事使外國者常賜州縣官十員使以名上以便其私



號私覲官公將行曰吾天子吏使海外國不足於資宜上請安有賣官以受錢邪卽具疏所以上以爲賢命有司與其費至鄆州會新羅告所當立君死還拜容州刺史容管經略招討使始城容州周十三里置屯田二十四所化大行詔加太中大夫順宗嗣位拜河南少尹行未至拜鄭滑行軍司馬始至襄陽詔拜諫議大夫旣至日言事不阿權臣蹇然有直名遂號爲才臣劉闢反圍梓州詔以公爲東川節度使御史大夫公行至漢中上疏言梓州在圍間守方盡力不可易將徵還入議蜀事劉闢去梓州因以梓州讓高崇文拜晉慈隰等州觀察防禦使自扶風縣男進封武陽郡開國公食邑二千戶將行上言臣所治三州非要



害地不足張職爲國家費不如屬之河東便上以爲忠一  
歲拜洪州刺史江南西道觀察使以晉慈隰屬河東公旣  
至則計口受俸錢委其餘於官罷八州無事之食者以聚  
其財始教人爲瓦屋取材於山召陶工教人陶聚材瓦於  
場度其費以爲估不取贏利凡取材瓦於官業定而受其  
償從令者免其賦之半逃未復者官與爲之貧不能者畀  
之財載食與漿親往勸之爲瓦屋萬三千七百爲重屋四  
千七百民無火憂暑濕則乘其高別命置南北市管諸軍  
歲旱種不入土募人就功厚與之直而給其食業成人不  
病饑爲長衢南北夾兩管東西七里人去溽息列切汚氣益  
蘇復作南昌縣徙廐于高地因其廢倉大屋馬以不連死



明年築堤扞江長十二里。䟽爲斗門以走潦水。公去位之  
明年江水平堤。老幼泣而思曰。無此堤。吾屍其流入海矣。  
灌陂塘五百九十八。得田萬二千頃。凡爲民去害興利。若  
嗜慾居三年。於江西八州無遺便。其大如是。其細可略也。  
卒有違令當死者。公不果於誅。杖而遣之。去上書告公所  
爲不法若干條。朝廷方勇於治。且以爲公名才能臣治功  
聞天下。不辯則受垢。詔罷官留江西待辯。使未至月餘。公  
以疾薨。使至辯。凡卒所告事若干條。皆無絲毫實。詔咎卒  
百流嶺南。公能益明。春秋五十八。薨於元和五年八月六  
日。公好施與。家無剩財。自校書郎至爲觀察使。擁吏卒前  
走七州刺史。與賓客處如布衣時。自持卑一不易。娶清河



崔氏故支江令諷之女其官其之孫有子曰寘年十五明  
經及第嗣其家業後夫人蘭陵蕭氏中書令華之孫殿中  
侍御史恒之女皆先公終有女一人凡公男若干人女若  
干人明年七月壬寅從葬萬年縣少陵原將葬其從事東  
平呂宗禮與其子寘謀曰我公宜得直而不華者銘傳於  
後固不朽矣寘來請銘銘曰

武陽受業始於太師以官讓兄自待不疑勤于紫閣取益  
以卑可謂有源卒用無疵慊慊爲人矯矯爲官爰及江西  
功德具完名聲之下獨處爲難辯而益明仇者所歎碑于  
墓前維昭美故納銘墓中以識公墓

唐故河南府王屋縣尉畢君墓誌銘



畢氏出東平。歷漢魏晉宋齊梁陳。士大夫不絕。入國朝有  
爲司衛少卿。貝邢廬許州刺史者。曰憬。憬之子構。累官至  
吏部尚書。卒。贈黃門監。是爲景公。景公生抗。爲廣平太守。  
抗安祿山城陷。覆其宗。贈戶部尚書。尚書生炯。家破時。炯  
生始四歲。與其弟增以俱小。漏名籍。得不誅。爲賞口。賊中  
寶應二年。河北平。宗人宏以家財贖出之。求增不得。增長  
爲河北從事。兼官至御史中丞。炯旣至長安。宏養於家。教  
讀書。明經第。宏死。炯益壯。始自別爲畢氏。歷尉臨渙安邑。  
王屋。年六十一。以元和六年二月二日卒於官。初。罷臨渙。  
徐州節度張建封慕廣平之節。死。聞君篤行能官。請相見。  
署諸從事。攝符離令。四年。及尉王屋。徐之從事有爲河南。



尹者聞君當來喜謂人曰河南庫歲入錢以千計者五六  
十萬須謹廉吏今畢侯來吾濟矣繼數尹諸署於府者無  
不變而畢侯固如初竟以其職死君睦親善事過客未嘗  
問有無既卒家無一錢凡棺與墓事皆同官與相識者事  
之娶清河張氏女生男四人曰鎬鉉鉅銳女子三人其長  
學浮屠法爲比丘尼其季二人未嫁以其月二十五日從  
葬偃師之土婁銘曰

上古愛民爲官求人苟可以任位加其身其後喜權人自  
求官退而緩者身後人先故廣平死節而子不荷其澤王  
屋謹廉而神不福其謙嗚呼天與人苟無傷其穴與墳

試大理評事胡君墓銘



胡之氏別於陳明允先河東人世勤固戴厥身籍文譜進  
連倫惟明允加武資力牛虎柔不持吏夏陽有施爲去平  
陽民思悲河東土河陸原宜茲人肖厚完五十七不足年  
孤兒啼死下官母弟証秩大夫撫君遺哭泣書友韓愈司  
馬徒作後銘系序初

襄陽盧丞墓誌銘

范陽盧行簡將葬其父母乞銘於職方員外郎韓愈曰吾  
先世世載族姓書吾胄於拓拔氏之弘農守守後四代吾  
祖也爲沂錄事參軍五世而吾父也爲襄陽丞始吾父自  
曹之南華尉歷萬年縣尉至襄陽丞以材任煩能持廉名  
去襄陽則署鹽鐵府出入十年常最其列貞元十三年終



其家年六十七殯河南河陰吾母燉

音屯

煌張氏也王父瓘

爲堯之金鄉令先君歿而十三年夫人終年七十三從殯

河陰生子男三人居簡金吾兵曹行簡則吾其次也大理

主簿佐江西軍其幼可久女子嫁浮梁尉崔叔寶將以今

年十月自河陰啓葬汝之臨汝之汝原吾曰陰陽星曆近

世儒莫學獨行簡以其力餘學能名一世舍而從事於人

以材稱葬其父母乞銘以圖長存是貞能子矣可銘也遂

以銘弘農諱懷仁沂諱璲

音皎

襄陽諱基今年實元和六年

### 唐河中府法曹張君墓碣銘

有女奴抱嬰兒來致其主夫人之語曰妾張圓之妻劉也妾  
夫常語妾云吾常獲私於夫子且曰夫子天下之名能文



辭者凡所言必傳世行後今妾不幸夫逢盜死途中將以  
日月葬妾重哀其生志不就恐死遂沈泯敢以其稚子汴  
見先生將賜之銘是其死不爲辱而名永長存所以蓋覆  
其遺胤子若孫且死萬一能有知將不悼其不幸於土中  
矣又曰妾夫在嶺南時嘗疾病泣語曰吾志非不如古人  
吾才豈不如今人而至於死於是也若爾吾哀必求  
夫子銘是爾與吾不朽也愈旣哭弔辭遂叙次其族世名  
字事始終而銘曰君字直之祖謹父孝新皆爲官汴宋間  
君嘗讀書爲文辭有氣有吏才嘗感激欲自奮拔樹功名  
以見世初舉進士再不第因去事宣武軍節度使得官至  
監察御史坐事貶嶺南再遷至河中府法曹叅軍攝虞鄉



令有能名。進攝河東令。又有名。遂署河東從事。絳州闕刺史。攝絳州事。能聞朝廷。元和四年秋。有事適東方。旣還八月壬辰。死於汴城西雙丘。年四十有七。明年二月日。葬河南偃師。妻彭城人。世有衣冠。祖好順。泗州刺史。父泳。卒。蘄州別駕。女四人。男一人。嬰兒汴也。是爲銘。

太原府叅軍苗君墓誌銘

君諱蕃。字陳師。其先楚之族。大夫亡晉而邑於苗。世遂以苗命氏。其後有守上黨者。惠于民。卒遂家壺關。曾大父延嗣。中書舍人。大父含液。舉進士第。官卒河南法曹。父穎揚州錄事叅軍。君少喪父。受業母夫人。舉進士第。佐江西使有勞。三年使卒。後辟不肯留。獨護其喪。葬河南。選補太原



叅軍假使職獄平貨滋息吏歛手不敢爲非年四十有二  
元和二年六月辛巳暴病卒其妻清河張氏以其年十二  
月丙寅葬君于洛陽平陰之原男三人執規執矩必復其  
季生君卒之三月君同生昆弟姊凡三人皆先死四室之  
孤男女凡二十人皆幼遺資無十金無田無宮以爲歸無  
族親朋友以爲依也天將以是安施耶銘曰

有行以爲本有文以爲華恭以事其職而勤以嗣其家位  
卑而無年吁其奈何

韓文卷之二十五終



韓文卷之二十六

碑誌

唐朝散大夫贈司勳員外郎孔君墓誌銘

昭義節度盧從史有賢佐曰孔君諱戡字君勝從史爲不法君陰爭不從則於會肆言以折之從史羞面頸發赤抑首伏氣不敢出一語以對立爲君更令改章辭者前後累數十坐則與從史說古今君臣父子道順則受成福逆輒危辱誅死曰公當爲彼不得爲此從史常聳聽喘汗居五六歲益驕有悖語君爭無改悔色則悉引從事空一府往爭之從史雖羞退益甚君泣語其徒曰吾所爲止於是不能以有加矣遂以疾辭去臥東都之城東酒食伎樂之燕



不與。當是時，天下以爲賢。論士之宜在天子左右者，皆曰：孔君，孔君云。會宰相李公鎮揚州，首奏起君。君猶臥不應。從史讀詔曰：是故舍我而從人耶？即誣奏君前，在軍有某事。上曰：吾知之矣。奏三上，乃除君衛尉丞，分司東都。詔始下，門下給事中呂元膺封還詔書。上使謂呂君曰：吾豈不知哉也？行用之矣。明年元和五年正月，將浴臨汝之湯泉。壬子，至其縣，食遂卒。年五十七。公卿大夫士相弔於朝，處士相弔於家。君卒之九十六日，詔縛從史送闕下，數以違命流于日南。遂詔贈君尚書司勳員外郎，蓋用嘗欲以命君者。信音伸其志。其年八月甲申，從塋河南河陰之廣武原。君於爲義若嗜欲，勇不顧前後，於利與祿則畏避，退處如



怯夫然始舉進士第自金吾衛錄事爲大理評事佐昭義軍軍帥死從史自其軍諸將代爲帥請君曰從史起此軍行伍中凡在幕府唯公無分寸私公苟留唯公之所欲爲君不得已留一歲再奏自監察御史至殿中侍御史從史初聽用其言得不敗後不聽信惡益聞君棄去遂敗祖某其官贈某官父某某官贈某官君始娶弘農楊氏女卒又娶其舅宋州刺史京兆韋岷女皆有婦道凡生一男四女皆幼前夫人從塋舅姑兆次卜人曰今茲歲未可以祔從卜人言不祔君母兄殲音達尚書兵部員外郎母弟戢殿中侍御史以文行稱朝廷將塋以韋夫人之弟前進士楚材之狀授愈曰請爲銘銘曰



允義孔君茲惟其藏更千萬年無敢壞傷

故中散大夫河南尹杜君墓誌銘

杜氏自戴侯畿始分戴侯之子恕爲幽州刺史今居京兆  
諸杜其後也其季寬孝廉郎中寬後三世曼爲河東太守  
塋其父汨胡端切水之陽其後世皆從塋汨水及正倫爲太  
宗宰相猶封襄陽公太宗始詔塋京兆襄陽公無子以兄  
正藏子志靜後遂嗣襄陽公生僑爲懷州長史棄官老沁水  
上爲富家卒塋懷州武陟長史生損爲左司郎中卒贈少大  
理大理生虞音異爲鄭州錄事參軍死思明亂贈吏部郎中  
公諱兼字某郎中第三子舉進士第司徒北平王燧戰河  
北掌書記累官至監察御史其後佐徐泗州軍遂至濠州刺



史徐泗州軍亂以兵甲三千人防淮道不絕有功加御史中丞賜紫衣金魚入爲刑部郎中以能官拜蘇州刺史旣辭行上書曰李錡且反必且奏族臣上固愛其才書奏即除吏部郎中遂爲給事中出爲商州刺史金商防禦使改河南少尹行大尹事半歲拜大尹元和四年十一月二十二日無疾暴薨年六十明年二月甲午從塋懷州夫人常山郡君張氏彭州刺史贈禮部侍郎旣音旣之女生子男三人柔立爲天長主簿詞立爲壽州參軍誼立爲順宗挽郎女一人將塋公之母兄太學博士冀與公之夫人及子男女謀曰塋宜有銘凡與我第游而有文者誰乎遂來請銘銘曰



杜氏大家世有顯人承繼綿綿以及公身始爲進士乃篤朋友及作大官克施克守纂辭奮筆渙若不思公牒盈前笑語指麾祿以給求食以會同不畜不收庫廩虛空事在于人日遠日忘何以傳之刻此銘章

唐銀青光祿大夫守左散騎常侍致仕上柱國襄陽郡王平陽路公神道碑銘

惟路氏遠有代序自隋尚書兵部侍郎諱衮四代而至冀公冀公諱嗣恭以小邑蕭關令發聞開元受賜更名書于太史治行靈州終功南邦享有丕祉紹開厥家官至兵部尚書封冀國公薨贈尚書右僕射司空公諱應字從衆冀公之嫡子用大臣子謹飭擢至侍御史著作郎選刺虔州



割餘雩都作縣安遠以利人屬鑿敗灘石以平贛古暗梗切

陶甓而城罷人屢築詔嗣冀封又加尚書屯田郎中進服色遂臨于溫築隄岳城橫陽界中二邑得上田除水害拜尚書兵部郎中兼御史中丞淮南軍司馬改刺廬州又甓其城人不歲苦入爲尚書職方郎中兼御史中丞佐塩鐵使使江東有功用半歲歷常州遷至宣歙池觀察使進封襄陽郡王至則出倉米下其估半以廩餓人蜀闢誅行軍千五百人於蜀李錡將反以聞置鄉兵萬二千人錡反命將期以卒救湖常坐牢江東心錡以無助敗縛作響山亭營軍左右權丞相善之鑱其說響山石居宣五年以疾去位校其倉得石者五十萬餘府得錢千者八十萬公之爲



州逢水旱喜賤出與人歲熟以其得收常有贏利故在所人不病饑而官府畜積元和六年天子憫公疾不可煩以職即其處拜左散騎常侍以其祿居其歲九月望薨于東都正平里第年六十七明年葬京兆萬年少陵原夫人滎陽鄭氏祔既其子臨漢縣男貫與其弟賞貞謀曰宜有刻也告於叔父御史大夫鄜坊丹延觀察使恕因其族弟進士羣以來請銘遂以其事銘曰

冀公之封維艱就功襄陽繼大啓慶自躬于虔洎溫厥緒既作以及職方遂都邦伯朝夕人事下完上實師于其鄉鄰寇逼屈營居響山牆屋脩施褒功刻表丞相之辭受代而家叙䟽及邇病不能廷食祿卒齒凡代大家維難其保



既顯既願。戒于終咎。伊我襄陽。克慎以有。延畀後承。莫不率守。有墓于原。維樹在經。以告無期。博士是銘。

烏氏廟碑銘

元和五年。天子曰。盧從史始立議用師于恒。乃陰與寇連。

夸謾兇驕。出不遜言。其執以來。其四月中。貴人承瓘

七罪切

即誘而縛之。其下皆甲以出。操兵趨譁牙門。都將烏公重胤當軍門叱曰。天子有命。從有賞。敢違者斬。於是士皆歛兵還營。卒致從史京師。壬辰詔用烏公爲銀青光祿大夫。河陽軍節度使兼御史大夫。封張掖郡開國公。居三年。河陽稱治。詔贈其父工部尚書。且曰。其以廟享。即以其年營廟于京師崇化里。軍佐竊議曰。先公既位常伯。而先夫人



無加命號名差卑於配不宜語聞詔贈先夫人劉氏沛國太夫人八年八月廟成三室同宇祀自左領府君而下作主于第乙巳升于廟烏氏著於春秋譜於世本列於姓苑在莒者存。在齊有餘枝鳴皆爲大夫。秦有獲爲大官。其後世之江南者家鄱陽。處北者家張掖。或入夷狄爲君長。唐初察爲左武衛大將軍。實張掖人。其子曰令望爲左領軍衛大將軍。孫曰蒙爲中郎將。是生贈尚書諱承玘字某。烏氏自莒齊秦大夫以來皆以材力顯。及武德以來始以武功爲名將家。開元中尚書管平盧先鋒軍屬破奚契丹從戰捺<sub>納</sub>祿走可突干。渤海擾海上至馬都山吏民逃徙失業。尚書領所部兵塞其道。漸原累石綿四百里深高皆三



丈寇不得進。民還其居。歲罷運錢三千萬餘。黑水室韋以騎  
五千來屬。麾下邊威益張。其後與耿仁智謀。說史思明降。  
思明復叛。尚書與兄承恩謀殺之。事發。族夷。尚書獨走免。  
李光弼以聞。詔拜冠軍將軍。守右威衛將軍。檢校殿中監。  
封昌化郡王。石嶺軍使。積粟厲兵。出入耕戰。以疾去職。貞  
元十一年二月丁巳。薨于華陰。告平里。年若干。即葬於其  
地。二子大夫爲長。季曰重元。爲某官。銘曰。

烏氏在唐。有家于初。左武左領。二祖紹居。中即少卑。屬于  
尚書。不償其勞。乃相大夫。授我戎節。制有壇墟。數備禮登。  
以有宗廟。作廟天都。以致其孝。右祖左孫。爰響其報。云誰  
無子。孰其無孫。克對無羞。乃惟有人。念昔平盧。爲艱爲瘁。



大夫承之危不棄義四方其平士有怠息來覲來齋以饋  
黍稷。

唐故河東節度觀察使榮陽鄭公神道碑文

河東節度使贈尚書右僕射鄭公葬在榮陽索上元和八年六月庚子太史尚書比部郎中護軍韓愈刻其墓碑曰司馬氏遷江南有鄭豁者仕慕容垂國爲其太子少保其孫簡當拓拔魏爲榮陽太守後簡者號其族爲南祖南祖之鄭入唐有爲利之景谷令者曰嘉範於公爲曾祖是生撫俗爲泗之徐城令徐城生公之父曰洪卒官涼之戶曹參軍公諱儋少依母家隴西李氏舉止異凡兒其舅吏部侍郎季卿謂其必能再立鄭氏稍長能自課學明左氏春



秋以進士選爲太原參軍事對直言策拜京兆高陵尉考  
府之進士能第上下以實不姦樊僕射澤以襄陽兵戰淮  
西公以參謀留府能任後事戶曹殞于涼涼地入西戎自  
景谷徐城三世皆未還榮陽塋公解官舉五喪爲三墓塋  
索東徐城墓無表公能幼長哀感心求不置以得舊人指  
告其處其後爲大理丞太常博士遷起居郎尚書司封吏  
部二郎中能官舉其名德宗晚節儲將於其軍以公爲河  
東軍司馬能以無心處嫌間卒用有就貞元十六年將說  
死即詔授司馬節節度河東軍除其官爲工部尚書太原  
尹兼御史大夫北都留守公之爲司馬用寬廉平正得吏  
士心及昇大帥持是道不變部將有因貴人求要職者公



不用用老而有功無勢而遠者。削四鄰之交。賄省姦嬖之  
大燕。校講民事。施罷不俟日。用能以十月成政。氓征就寬。  
軍給以饒。十七年疾。廢朝夕。八月庚戌薨。享年六十一。天  
子爲之不能臨朝者三日。贈尚書右僕射。卽以其年十月  
辛卯葬。索上疾比薨。醫問交道。比葬。弔贈賜使者相及。凡  
河東軍之士與太原之氓吏及旁九郡百邑之鰥寡外夷  
狄之統於府者。聞公之薨。皆哭曰。吾其如何。公與賓客朋  
遊飲酒必極醉。投壺博奕。窮日夜。若樂而不厭者。平居簾  
閣據几。終日不知有人。別自號白雲翁。名人魁士鮮不與  
善。好樂後進。及門接引。皆有恩意。始娶范陽盧氏女。生仁  
本。仁約。仁載。皆有文行。二季舉進士。皆早死。仁本爲後子。



獨存不樂舉選年三十餘始佐河陽軍後娶趙郡李氏生三女二夫人凡三男五女長女嫁遼東李繁繁亦名臣子有才學遺命二夫人各別爲墓不合葬系曰

士常患勢卑不能推功德及人常患貧無以奉所欲得若鄭公者勤生以得其位而曾不得湏臾有焉雖然觀其所旣立其可知已嗚呼哀哉

魏博節度觀察使沂國公先廟碑銘

元和八年十一月壬子上命丞相元衡丞相吉甫丞相絳召太史尚書比部郎中韓愈至政事堂傳詔曰田弘正始有廟京師朕惟弘正先祖父厥心靡不嚮帝室訖不得施乃以教付厥子維弘正銜訓事嗣朝夕不怠以能迎天之



休顯有不功。維父子繼忠孝。予維寵嘉之。是以命汝愈銘。  
欽哉。惟時臣愈承命。悸恐。明日詣東上閤門。拜疏辭謝。不  
報。退伏念。昔者魯僖公能遵其祖伯禽之烈。周天子實命  
其史臣克。作爲駟駟音必泮閼之詩。使聲于其廟。以假音格魯  
陵。今天子嘉田侯服父訓。不違用康靖我國家。蓋寵銘之。  
所以休寧田氏之祖考。而臣適執筆。隸太史。奉明命。其可  
以辭。謹案魏博節度使銀青光祿大夫檢校工部尚書兼  
魏州大都督府長史御史大夫沂國公田弘正。北平盧龍  
人。故爲魏博諸將。忠孝畏慎。田季安卒。其子幼弱。用故事  
代父。人吏不附。迎弘正於其家。使領軍事。弘正籍其軍之  
衆與六州之人。還之朝廷。悉除河北故事。比諸州。故得用。



爲帥已而復贈其父故滄州刺史兵部尚書母夫人鄭氏  
梁國太夫人得立廟祭三代曾祖都水使者府君祭初室  
祖安東司馬贈襄州刺史府君祭二室兵部府君祭東室  
其銘曰

唐繼古帝海外受制狎于大寧燕盜以驚羣黨相維河北  
失平號登元和大聖載營風揮日舒咸順指令業業音魏  
土嬰兒戲兵吏戎愁毒莫保罍頸人曰田侯其德可倚呌  
譟奔趨乘門請起田侯攝事奉我天明束縛弓戈考校度  
程提壇籍戶來復邦經帝欽良臣曰維錫予嗟我六州始  
復故初告慶于宗以降命書旌節有韜豹尾神旗橐瓿戟  
纛以長魏師田侯稽首臣愚不肖追茲有成祖考之教帝



韓文卷之二十六終  
曰俞哉維汝忠孝予思乃父追秩夏卿嬋德娠賢梁國是  
榮田侯作廟相方視陟見于著龜祖考咸喜暨暨田侯兩  
有文武訖其外庸可作承輔咨汝田侯勿亟勿遲觀饗式  
時爾祖爾思



韓文卷之二十七

碑誌

劉統軍碑

唐故陳許軍節度使金紫光祿大夫檢校尚書左僕射兼御史大夫右龍武統軍彭城郡開國公食邑二千戶贈潞州大都督劉公諱昌裔字光後薨既葬將反机于京舍于墓次故吏文武士門人送客訖事會哭將退咸顧戀牽連一口言曰自我公薨至葬凡所以校德焯之藥切勤者莫不粗完隱卒崇終有都督之詔日事時功以著不可誣有太史之狀太常之狀有謚有誄有幽堂之銘又如卽外碑刻文以顯詩之其於傳無已豈不益可保於是相許諾以告



其孤縱縱哭捨杖拜曰縱不敢違則相與刻銘文曰

劉處彭城本自楚元陽曲之別繇公祖遷公曾祖考爲朔

州守祖令太原仍世北邊樂其高寒棄楚不還逮于公身

三世晉人公生而異魁頰鉅鼻幼如舒退少長好事西戎

乘勢盜有河外公雖家居爲國暗於金噫鳥界切來告邊帥

可破之計楊琳爲橫巴蜀靡彫公由游寄單船諭招折其

尾毒不得動搖琳後來降公不有功終琳之已還臥民里

蓋古有云人職其憂無事於職而與國謀德宗之始爲曲

環起奮筆爲檄強寇氣死決敗筭成效於屈指環有許師

公遂佐之蘇民軋敵多出公畫累拜郎中進兼中丞雖在

陪貳天子所憑蔡卒幸喪圍我許郭新師不牢臥音勦穰音



將逋公爲陳方應變爲械與之上下寇無所賴遂至遁敗以功遷陳實許之半聲駕元侯以勢自憚復入居許爲軍司馬脫權下威士心益歸卒嗣環職棄惡從德乃與蔡通塗其榛棘稚耄嬉遨連手歌謳上無可怨外無與讐旣長事官悛之大夫其償未塞僕射以都及癸巳歲秋涌水出流過其部破民廬室公卽䟽言此皆臣憊防斷不補漬民於泉臣耄且疾宜卽大罰上曰熒害大臣其來允余之思其可止哉驛隸走呼有中使來公迎于驛遂行不廻六月隆熱上下歔<sub>許極切</sub>輒公鞭公驅去馬以輿公病日惡不能造闕仆臥在宅閤有加錫命爲統軍龍武之右兼官左相百僚長首冬十一月日將南至公遂薨殂年六十二奏聞



恒悼俾官臨弔悲不聽朝贈督潞州存歿之賚於數爲優  
明年九月東葬金谷公徃有命匪後人卜

衢州徐偃王廟碑

徐與秦俱出柏翳爲嬴姓國於夏殷周世咸有大功秦處  
西偏專用武勝遭世衰無明天子遂虎吞諸國爲雄諸國  
旣皆入秦爲臣屬秦無所取利上下相賊害卒償其國而  
沈其宗徐處得地中文德爲治及偃王誕當國益除去刑  
爭末事凡所以君國子民待四方一出於仁義當此之時  
周天子穆王無道意不在天下好道士說得八龍騎之西  
遊同王母宴于瑤池之上歌謳忘歸四方諸侯之爭辯者  
無所質正咸賓祭於徐贊玉帛死生之物于徐之庭者三



十六國得朱弓赤矢之瑞穆王聞之恐遂稱受命命造父御長驅而歸與楚連謀伐徐徐不忍鬪其民北走彭城武源山下百姓隨而從之萬有餘家偃王死民號其山爲徐山鑿石爲室以祠偃王偃王雖走死失國民戴其嗣爲君如初駒王章禹祖孫相望自秦至今名公巨人繼跡史書徐氏十望其九皆本於偃王而秦後迄茲無聞家天於柏翳之緒非偏有厚薄施仁與暴之報自然異也衢州故會稽太音末也民多姓徐氏支縣龍丘有偃王遺廟或曰偃王之逃戰不之彭城之越城之隅棄玉几研于會稽之水或曰徐子章禹旣執於吳徐之公族子弟散之徐揚二州間卽其居立先王廟云開元初徐姓二人相屬爲刺史帥



其部之同姓改作廟屋載事于碑後九十年當元和九年

而徐氏放復爲刺史放字達夫前碑所謂今戶部侍郎其

大父也春行視農至于龍丘有事于廟思惟本原曰故制

狃

倉胡切

樸下窄不足以揭

音錫

虔妥靈而又梁桷赤白哆馳

切

剥不治圖像之威

音黜

昧就滅藩拔級夷庭木禿缺祈

咎日慢祥慶弗下州之羣支不獲蔭庇余惟遺紹而尸其

土不卽不圖以有資聚罰其可辭乃命因故爲新衆工齊

事惟月若日工告訖功大祠于廟宗卿咸序應是歲州無

怪風劇雨民不夭厲穀果完實民皆曰耿耿社哉其不可

誣乃相與請辭京師歸而鑱之于石辭曰

秦傑以顛徐由遜縣秦鬼久饑徐有廟存婉婉偃王惟道



之耽以國易仁爲笑于頑自初擅命其實幾姓歷短詈長  
有不償亡課其利害孰與王當姑蔑之墟太末之里誰思  
王恩立廟以祀王之聞孫世世多有唯臨茲邦廟土實守  
堅嶠之後達夫廓之王歿萬年如始祔時王孫多孝世奉  
王廟達夫之來先慎詔教盡惠廟民不主於神維是達夫  
知孝之元太末之里姑蔑之城廟事時修仁孝振聲宜寵  
其人以及後生嗟嗟維王雖古誰亢王死于仁彼以暴喪  
文追作誄刻示范范

袁氏先廟碑

袁公滋旣成廟明歲二月自荆南以旂節朝京師留六日  
得壬子春分率宗親子屬用少牢于三室旣事退言曰嗚



呼遠哉。維世傳德。襲訓集余。乃今有濟。今祭旣不薦金石  
音聲。使工歌詩。載烈象容。其奚以飭稚昧於長久。唯敬繫  
羊豕。幸有石。如具著先人名跡。因爲詩繫之語下。於義其  
可。雖然。余不敢必屬篤古而達於詞者。遂以命愈。愈謝非  
其人。不獲命。則謹條袁氏本所以出。與其世系里居。起周  
歷漢魏晉。拓拔魏周隋。入國家以來。高曾祖考所以劬躬  
燾後。委祉于公。公之所以逢將承應者。有槩有詳。而綴以  
詩。其語曰。周樹舜後陳。陳公子有爲。大夫食國之地。表鄉  
者。其子孫世守不失。因自別爲袁氏。春秋世陳常壓於楚。  
與中國相加尤疏。袁氏猶班班見可譜。常居陽夏。音賈陽夏  
至晉屬陳郡。故號陳郡袁氏。博士固申儒遏黃。唱業於前。



至司徒安懷德於身表氏遂大顯連世有人終漢連魏晉  
分仕南北始居華陰爲拓拔魏鴻臚鴻臚諱恭生周梁州  
刺史新縣孝侯諱穎孝侯生隋左衛大將軍諱溫去官居  
華陰武德九年以大耄薨始葬華州左衛生南州刺史諱  
士政南州生當陽令諱倫於公爲曾祖當陽生朝散大夫  
石州司馬諱知玄司馬生贈工部尚書咸寧令諱曄是爲  
皇考表氏舊族而當陽以通經爲儒位止縣令石州用春  
秋持身治事爲州司馬以終咸寧備學而貫以一文武隨  
用謀行功從出入有立不爵于朝比三世宜達而室歸成  
後人數當于公公惟曾大父大父皇考比三世存不大夫  
食歿祭在子孫唯將相能致備物世彌遠禮則益不及在



慎德行業治圖功載名以待上可無細大無敢不敬畏無  
早夜無敢不思成于家進于外以立于朝自侍御史歷工  
部員外郎祠部郎中諫議大夫尚書右丞華州刺史金吾  
大將軍由卑而鉅莫不官稱遂爲宰相以贊辯章仍持節  
將蜀滑襄荊略苞河山秩登祿富以有廟祀具如其志又  
垂顯刻以教無忘可謂大孝詩曰表自陳分初尚蹇連越  
秦造漢博士發論司徒任德忍不錮人收功厥後五公重  
尊晉氏于南來處華下鴻臚孝侯用適操捨南州勤治取  
最不懈當陽耽經唯義之畏石州烈烈學專春秋懿哉咸  
寧不名一休趨難避成與時泛浮是生孝子天子之宰出  
把將符羣州承楷數以立廟祿以備器由曾及考同堂異



置柏版松楹其筵肆肆維表之廟孝孫之爲順勢卽宜以  
諏以龜以平其巇屋牆持持孝孫來享來拜廟庭陟堂進  
室親登籩飴肩臠女朱切胎音胎骼音格其樽玄清降登受胙于  
慶爾成維曾維祖維考之施于爾孝嗣以報以祗凡我有  
今非本曷思刻詩牲繫維以告之

清河郡公房公墓碣銘

公諱啓字某河南人其大王父融王父琯仍父子爲宰相  
融相天后事遠不大傳琯相玄宗肅宗處艱難中與道進  
退薨贈太尉流聲于茲父乘仕至祕書少監贈太子詹事  
公胚胎前光生長食息不離典訓之內目濡耳染不學以  
能始爲鳳翔府參軍尚少人吏迎觀望見咸曰真房太尉



家子孫也不敢弄以事轉同州澄城丞益自飾理同官憚  
伏衛晏使嶺南黜陟求佐得公擢摘良姦南土大喜還進  
昭應主簿裴胄領湖南表公爲佐拜監察御史部無遺事  
胄遷江西又以節鎮江陵公一隨遷佐胄累功進至刑部  
員外郎賜五品服副胄使事爲上介上聞其名徵拜虞部  
員外在省籍籍遷萬年令果辯傲吉歷切絕貞元末王叔文  
用事材公之爲舉以爲容州經略使拜御史中丞服佩視  
三品管有嶺外十三州之地林蠻洞蜒音誕守條死要不相  
漁劫稅節賦時公私有餘削衣貶食不立資遺以班親舊  
朋友爲義在容九年遷領桂州封清河郡公食邑三千戶  
中人使授命書應待失禮客主違言徵貳太僕未至貶虔



州長史而坐使者以疾卒官年五十九其子越能輯父事無失謹謹致孝既葬碣墓請銘銘曰

房氏二相厥家以聞條葉被澤况公其孫公初爲吏亦以門庇佐使于南乃始已致既辦萬年命屏容服功緒卓殊氓獠循業維不順隨失署亡資非公之怨銘以著之

唐故銀青光祿大夫檢校左散騎常侍兼右金吾衛大將軍贈工部尚書太原郡公神道碑文

公諱用字師柔太原人莊憲皇太后之弟今天子之舅太師之子太尉之孫司徒之曾孫元和元年上朝太后南宮大襲外氏自外高王父而下至外王父咸冊登公師事載之史皇太后昆弟唯公一人於是特拜銀青光祿大夫太



子少詹事。未三月，因遷大詹事，賜勲上柱國，爵封郡公。國  
于太原，益掌廐苑之事。公起外戚子弟，秩卑年少，歲餘超  
居上班，官尊職大，朝夕兩宮，而能敬讓以敏，持以禮法，不  
挾不矜，賓接士大夫，高下中度，興官耆事，滋久愈謹。由是  
朝廷推賢，所處號治。轉少府監，太子賓客，別職仍初。遷左  
散騎常侍，兼右金吾大將軍，皆以選進，不專爲恩。十一年  
秋，將以八月葬莊憲皇后，前一月壬申，以疾告薨。春秋四  
十有七。上罷朝二日，爲位以哭，贈工部尚書。十一月壬申，  
葬于萬年縣落女原。夫人河南胡氏，號太原郡夫人，有子  
六人，女子一人。葬得日，公之姊壻京兆尹李脩謂太子右  
庶子韓愈曰：「子以文常銘賢公卿，今不可以辭。」應曰：「諾。」而



爲銘曰。

有嶠音喬氏國。實出炎軒。蜀塗莘摯。正妃之門。孰豐其川。不  
羨其源。王氏周冑。官封繼繼。實生聖女。以母唐帝。公惟后  
季。天子吾甥。卑躬慎德。不與寵橫。方年未老。后哀猶新。如  
何不惠。而殞其身。刻文茲石。久載攸存。

韓文卷之二十七終



卷之二十一

...



...





